


29444

甲



廿六

列傳卷第七

元史一百二十

翰林學士 罷矣知制誥兼修國史 皇濂翰林待 製真郎知制誥兼國史院編修官 臣王禕等奉

勅修

察罕

亦力撒合

立智理威

察罕初名益德唐兀烏密氏父曲也怯律為夏臣其
妾方懷察罕不容於嫡母以配掌羊群者及里木察
罕稍長其母以告且曰嫡母已有弟矣察罕武勇過
人幼牧羊於野植杖於地脫帽寘杖端跪拜歌舞太
祖出獵見而問之察罕對曰獨行則帽在上而尊二
人行則年長者尊今獨行故致敬於帽且聞有大官

至先習禮儀耳帝異之乃挈以歸語光獻皇后曰今日出獵得佳兒可善視之命給事內廷及長賜姓蒙古妻以宮人弘吉刺氏嘗行困脫靴藉草而寢鶉鳴其旁心惡之擲靴擊之有蛇自靴中墜歸以其事聞帝曰是禽人所惡者在爾則為喜神宜戒子孫勿殺其類從帝略雲中桑乾金將定薛擁重兵守野狐嶺帝遣察罕覘虛實還言彼馬足輕動不足畏也帝命鼓行而前遂破其軍圍白樓七日拔之以功為御帳前首千戶從帝征西域孛哈里薛迷思干二城回回國主札刺丁拒守鐵門關兵不得進察罕先驅開道

斬其將餘衆悉降又從攻西夏破肅州師次甘州察罕父曲也怯律居守城中察罕射書招之且求見其弟時弟年十三命登城於高處見之且遣使諭城中使早降其副阿綽等三十六人合謀殺曲也怯律父子并殺使者併力拒守城破帝欲盡坑之察罕言百姓無辜止罪三十六人進攻靈州夏人以十萬衆赴援帝親與戰大敗之還次六盤夏主堅守中興帝遣察罕入城諭以禍福衆方議降會帝崩諸將擒夏主殺之復議屠中興察罕力諫止之馳入安集遺民太宗即位從略河南北還清水荅蘭荅八之地賜馬三

百珠衣金帶鞍勒皇子闊出忽都禿伐宋命察罕為
斤候又從親王口溫不花南伐歲乙未克棗陽及光
化軍未幾召口溫不花赴行在以全軍付察罕丁酉
復與口溫不花進克光州戊戌授馬步軍都元帥率
諸翼軍攻拔天長縣及滁壽泗等州定宗即位賜黑
貂裘一鑲刀十命拓江淮地憲宗即位召見累賜金
五十兩珠衣一金綺二疋以都元帥兼領尚書省事
賜汴梁歸德河南懷孟曹濮太原三千餘戶為食邑
及諸處草地合一萬四千五百餘頃戶二萬餘未幾
復召賜金四百五十兩金綺弓矢等物乙卯卒贈推

忠開濟翊運功臣開府儀同三司上柱國追封河南
王謚武宣子十人長木花里木花里事憲宗直宿衛
從攻釣魚山以功授四斡耳朶怯憐口千戶賜金幣
及黃金馬鞍勒世祖即位賜金五十兩珠二串至元
四年攻宋自江陵略地回至安陽灘宋兵扼其歸路
木花里奮擊敗之都元帥阿木墜馬宋軍追及之木
花里挾之上馬鏖戰退宋兵由是得免特賜銀二百
五十兩佩金虎符為蒙古軍萬戶復攻襄樊有功卒
于軍贈推誠宣力功臣榮祿大夫平章政事柱國追
封梁國公謚武毅從孫亦力撒合

元史列傳卷之
三
亦力撒合祖曲也怯祖太祖時得召見屬皇子察哈
台為扎魯火赤父阿波古事諸王阿魯忽居西域至
元十年擇貴族子備宿衛召亦力撒合至闕下以為
速古兒赤掌服御事甚見親幸有大政時以訪之稱
之曰秀才而不名嘗奉使河西還奏諸王只必帖木
兒用官太濫帝嘉之擢河東提刑按察使逐平陽路
達魯花赤泰不花召還賜黃金百兩銀五百兩以旌
其直進南臺中丞帝出內中寶刀賜之曰以鎮外臺
時丞相阿合馬之子忽辛為江浙行省平章政事恃
勢貪穢亦力撒合發其姦得贓鈔八十一萬錠奏而

誅之并劾江淮釋教摠攝楊輦真加諸不法事諸道
竦動二十一年改北京宣慰使諸王乃顏鎮遼東亦
力撒合察其有異志必反密請備之二十三年罷宣
慰司立遼陽行省以亦力撒合為參知政事已而乃
顏果反帝自將征之時諸軍皆會亦力撒合掌運糧
儲軍供無乏東方平帝嘉其先見且餉運有勞加左
丞二十七年命尚諸王筭吉女親為資裝以送之併
贈玉帶一改四川行省左丞二十九年再賜玉帶一
元貞元年成宗即位入朝卒弟立智理威
立智理威為裕宗東宮必闡赤典文書至元十八年

蜀初定帝閱其地久受兵百姓傷殘擇近臣撫安之
以立智理威爲嘉定路達魯花赤時方以闢田均賦
弭盜息訟諸事課守令立智理威奉詔甚謹民安之
使者交薦其能會盜起雲南號數十萬聲言欲寇成
都立智理威馳入告急言辭懇切繼以泣涕大臣疑
其不然帝曰雲南朕所經理未可忽也乃推食以勞
之又語立智理威曰南人生長亂離豈不厭兵畏禍
耶御之乖方保之不以其道故爲亂耳其歸以朕意
告諸將叛則討之服則捨之母多殺以傷主意則人
必定矣立智理威至蜀宣布上旨俄召爲泉府卿後

遷刑部尚書有小吏誣告漕臣劉獻盜倉粟宰相桑
哥方事聚斂衆阿其意鍛煉枉服立智理威曰刑部
天下持平今輦轂之下漕臣以冤死何以正四方乎
即以實聞以是忤丞相出爲江東道宣慰使在官務
興學諸生有俊秀者拔而用之爲政嚴明豪民滑吏
縮手不敢犯然亦無所刑戮而治元貞二年遷四川
行省參知政事蜀有婦人殺夫者繫治數十人加以
箠楚卒不得其實立智理威至盡按得之大德三年
以參知政事爲湖南宣慰使繼改荆湖荆湖多弊政
而公田爲甚部內實無田隨民所輸租取之戶無大

元史列傳卷七
五
小皆出公田租雖水旱不免立智理威問民所不便
凡十數事上於朝而言公田尤切朝議遣使理之會
有詔凡官無公田者始隨俸給之民力少蘇七年再
遷四川行省參知政事八年進左丞雲南王入朝所
在以驛騎縱獵立智理威曰驛騎所以傳命令事非
有急且不得馳况獵乎王憚爲之止獵蜀人饑親勸
分以賑之所活甚衆有死無葬者則以已錢買地使
葬且修寬政以撫其民部內以治十年入朝帝以白
金對衣賜之加資德大夫湖廣行省左丞湖廣歲織
幣上供以省臣領工作遣使買絲他郡多爲奸利工

官又爲刻剝故匠戶日貧造幣益惡立智理威不遣
使令工視買人有歲絲者擇買之工不告病歲省費
數萬貫他郡推用之皆便至大三年以疾卒於官年
五十七初贈資德大夫陝西行省右丞上護軍寧夏
郡公謚忠惠再贈推誠亮節崇德贊治功臣榮祿大
夫中書平章政事柱國秦國公子二人長買訥翰林
學士承旨次韓嘉訥御史大夫孫達理麻內府宰相
札八兒火者

札八兒火者賽夷人賽夷西域部之族長也因以爲
氏火者其官稱也札八兒長身美髯方瞳廣額雄勇

善騎射初謁太祖于軍中一見異之太祖與克烈汪罕有隙一夕汪罕潛兵來倉卒不爲備衆軍大潰太祖遽引去從行者僅十九人扎八兒與焉至班朱尼河餼糧俱盡荒遠無所得食會一野馬北來諸王哈扎兒射之殪遂剝革爲釜出火于石汲河水煮而啖之太祖舉手仰天而誓曰使我克定大業當與諸人同甘苦苟渝此言有如河水將士莫不感泣汪罕旣滅西域諸部次第亦平乃遣扎八兒使金金不爲禮而歸金人恃居庸之塞冶鐵錮關門布鐵蒺藜百餘里守以精銳扎八兒旣還報太祖遂進師距關百里不能前召扎八兒問計對曰從此而北黑樹林中有間道騎行可一人臣向嘗過之若勒兵銜枚以出終夕可至太祖乃令扎八兒輕騎前導日暮入谷黎明諸軍已在平地疾趨南口金鼓之聲若自天下金人猶睡未知也比驚起已莫能支吾鋒鏑所及流血被野關旣破中都大震已而金人遷汴太祖覽中都山川形勢顧謂左右近臣曰朕之所以至此者扎八兒之功爲多又謂扎八兒曰汝引弓射之隨箭所落悉畀汝爲己地乘輿北歸留扎八兒與諸將守中都授黃河以北鐵門以南天下都達魯花赤賜養老一百

戶并四王府爲君第扎八兒每戰被重甲舞樂陷陣
馳突如飛嘗乘橐駝以戰衆莫能當有丘真人者有
道之士也隱居崑崙山中太祖聞其名命扎八兒往
聘之丘語扎八兒曰我嘗識公扎八兒曰我亦嘗見
真人他日偶坐問扎八兒曰公欲極一身貴顯乎欲
子孫蕃衍乎扎八兒曰百歲之後富貴何在子孫無
恙以承宗祀足矣丘曰聞命矣後果如所願云卒年
一百一十八贈推忠佐命功臣太傅開府儀同三司
上柱國追封涼國公謚武定二子阿里罕明里察阿
里罕蚤從扎八兒出入行陣勇而善謀憲宗伐蜀爲

天下質子兵馬都元帥生哈只終湖南宣慰使贈推
誠保德功臣金紫光祿大夫司徒追封涼國公謚安
惠生陝西行省平章政事養安太府監丞阿思蘭太
僕寺丞補孛養安生阿葩實太僕寺卿明里察贈開
府儀同三司上柱國追封涼國公謚康懿生戶部尚
書亦不剌金陝西行省參知政事哈刺

朮赤台

朮赤台兀魯兀台氏其先刺真八都以材武雄諸部
生子曰兀魯兀台曰忙兀與扎刺兒弘吉刺亦乞列
思等五人當開創之先協贊大業厥後太祖即位命

其子孫各因其名爲氏號五投下朔方既定舉六十
五人爲千夫長兀魯兀台之孫曰木赤台其一也木
赤台有膽略善騎射勇冠一時初怯列王可汗之子
鮮昆有智勇諸部畏之怯列亦哈刺哈真沙陀等帥
衆來侵兵戰不利近臣忽因答兒等馳告太祖曰事
急矣群下忠勇無踰木赤台者宜急遣之拒敵從之
木赤台承命單騎陷陣射殺鮮昆降其大將失列門
等遂併有怯列之地乃蠻滅兒乞台合兵來侵諸部
有陰附之者不虞太祖領兵卒至諸部潰去乘勝敗
之木赤台俘其主扎哈堅普及二女以歸諸部悉平

與扎哈堅普盟而歸之未幾乃蠻復叛木赤台以計
襲扎哈堅普殺之遂平其國木赤台始從征怯列亦
自罕哈啓行歷班真海子間關萬里每遇戰陣必爲
先鋒帝嘗諭之曰朕之望汝如高山前日影也賜嬪
御木八哈別吉引者思百俾統兀魯兀四千人世世
無替子怯台材武過人自太宗及世祖歷事四朝以
勞封德清郡王賜金印丙申賜德州戶二萬爲食邑
至元十八年增食邑二萬一千戶肇慶路連州德州
洎屬邑俱隸焉怯台薨子端真拔都兒襲爵爲郡王
太宗時與亦刺哈台戰勝帝即以亦刺哈妻賜之世

祖之征阿里不哥也怯台子哈答與忽都忽跪而自
獻于前曰臣父祖幸在先朝當軍旅征伐之寄屢立戰
功今王師北征臣等幸少壯願如父祖以力戰自効
既得請於是戰于石木溫都之地諸王哈丹駙馬臘
真與兀魯忙兀居右諸王塔察兒及太丑台居左合
必赤將中軍兵始交獲其將合丹斬之外刺之軍遂
敗衄又戰于失烈延塔兀之地當帝前混戰至日晡
勝之帝賜以黃金將佐吏卒行賞各有差李壇叛帝
遣哈必赤及兀里罕哈台闊闊出往討之哈答與兀
魯納兒台亦在行壇平與有功焉哈答子脫歡亦嘗

從諸王徹徹都討只兒火台獲之又嘗破失烈吉要
不忽兒于野孫漠連及征乃顏脫歡弟慶童亦在軍
雖病猶力戰怯台二子曰端真曰哈答哈答三子曰
脫歡曰亦隣只班曰慶童脫歡二子曰塔失帖木兒
曰朶來塔失帖木兒一子曰匣刺不花自怯台而下
凡九人皆封郡王云

鎮海

鎮海怯烈台氏初以軍伍長從太祖同飲班朱尼河
水與諸王百官大會兀難河上太祖尊號曰成吉思
皇帝歲庚午從太祖征乃蠻有功賜良馬一壬申從

攻曲出諸國賜珍珠旗佩金虎符爲闐里必從攻塔
塔兒欽察唐兀只溫契丹女直河西諸國所俘生口
萬計悉以上獻賜御用服器白金等物命屯田於阿
魯歡立鎮海城戍守之壬申從太祖謀定漢地師次
隆興與金將忽察虎戰矢中臆間裹瘡而出者復數
四軍聲爲之大振既破燕太祖命於城中環射四箭
凡箭所至園池邸舍之處悉以賜之尋拜中書右丞
相己丑太宗即位扈從至西京攻河中河南均州蔡
已攻蔡州以功賜恩州一千戶先是收天下重男童
女及工匠置局弘州既而得西域織金綺紋工三百
餘戶及汴京織毛褐工三百戶皆分隸弘州命鎮海
世掌焉定宗即位以鎮海爲先朝舊臣仍拜中書右
丞相薨年八十四子十人勃古思繼食其封邑從世
祖征花馬大理率兵千人結浮橋于金沙江以濟師
中統初論功授益州等路宣撫使賜金虎符玉帶三
年改東平路副達魯花赤討平叛寇尋遷濟南等路
宣慰至元二年遷南京路達魯花赤四年討平蘄縣
叛民以病乞謝事特授保定路達魯花赤賜錢一萬
貫歸老子家卒年八十一

肖乃台

肖乃台秃伯怯烈氏以忠勇侍太祖時木華黎博兒
朮既立爲左右萬戶帝從容謂肖乃台曰汝願屬誰
麾下爲我宣力對曰願屬木華黎即日命佩金符領
蒙古軍從太師國王爲先鋒兵至河北史天澤之父
率老幼數千詣軍門降國王承制授天澤兄天倪河
北西路都元帥領真定乙酉天澤送母還白霄副帥
武僊殺天倪以真定叛經歷王縉追天澤至燕請攝
主帥遣監軍李伯祐詣國王軍前言狀且請援兵國
王命肖乃台率精兵三千與天澤合兵進圍中山僊遣
其將葛鐵槍來援肖乃台撤圍迎之遇諸新樂奮擊

敗之會日暮阻水爲營肖乃台料其氣索必宵遁乘
勝復進擊大敗之擒鐵槍中山守將亦宵遁遂克中
山取無極拔趙州僊棄真定奔西山抱犢寨肖乃台
與天澤入城撫定其民未幾僊潛結水軍爲內應夜
開南門納僊復據其城肖乃台倉卒以步兵七十踰
城奔藁城遲明部曲稍來集兵威復振襲取真定僊
棄城遁將士怒民之反覆驅萬人出將屠之肖乃台
曰金氏慕國威信僕我來蘇此民爲賊所驅脇有何
罪焉若不勝一朝之忿非惟自屈其力且堅他城不
降之心乃皆釋之初僊之叛也其弟質國王軍中聞

之遁去肖乃台遣弟撒寒追及於紫荆關斬之俘其
妻子而還乃整兵前進下太原略太行拔長勝寨斬
僊守將盧治中圍僊於雙門寨僊遁去引兵出太行
山東遇宋將彭義斌與戰敗之追至火炎山破其營
擒義斌斬之至大明守將蘇元帥以城降遂引兵臨
東平敗安撫王立剛于陽穀圍東平立剛走連水金
守將棄城遁他將邀擊敗之遂定東平又與蒙古不
花狗河北懷孟衛從國王定益都壬辰度河略汴京
徇睢州遇金將完顏慶山奴與戰敗之追斬慶山奴
金主入蔡諸軍圍之肖乃台史天澤攻城北而汝水

阻其前結筏潛渡血戰連日金亡朝廷以肖乃台功
多命併將史氏三萬戶軍以圖南征賜東平戶三百
俾食其賦命嚴實爲治第宅分撥牧馬草地日膳供
二羊及衣糧等以老病卒于東平歸葬漠北子七人
抹兀荅兒兀魯台知名

抹兀荅兒歲戊戌從國王忽林赤行省于襄陽略地
兩淮已未從渡江攻鄂州以功賞銀五十兩中統元
年追阿蘭荅兒渾都海預有戰功二年從吐征敗阿
里不哥於失木禿之地三年又與李壇戰有功國王
忽林赤上其功奉旨賞銀五十兩授提舉本授下諸

色匠戶達魯花赤卒子四人火你赤江南行臺御史大夫

兀魯台中統三年從石高山奉旨拘集探馬赤軍授本軍千戶至元八年授武略將軍佩銀符十年攻樊城有功換金符武德將軍十一年渡江有功賞銀三百兩改武節將軍十二年四月軍至建安卒于軍子脫落合察兒襲職從參政阿剌罕攻獨松關有功陞宣武將軍尋命管領侍衛軍樞密院錄其渡江以來累次戰功十八年陞懷遠大將軍二十年江西行省命討武寧叛賊董琦平之改授虎符江州萬戶府達魯花赤二十四年移鎮潮州值賊張文惠羅半天等嘯聚江西行樞密院檄討之領兵破賊寨斬賊首羅大老李尊長等獲其偽銀印三卒于軍

吾也而

吾也而珊竹氏狀貌甚偉腰大十圍父曰圖魯華察以武勇稱太祖五年吾也而與折不那演克金東京有功九年從太師木華黎取北京領兵爲先驅下之捷聞授金紫光祿大夫北京總管都元帥留撫其人綏懷有方自京以南相繼來降時金將撻魯以惠州漁河口爲隘有衆數萬圖復北疆吾也而以銳兵千

人擊摧其鋒殺數千人獲其旗鼓羊馬斬捷魯於軍
中有趙守玉者據興州吾也而討平之十一年張致
以錦州叛又攻破之木華黎大喜以馬十匹甲五事
賞其功十二年興州監軍重兒以兵叛吾也而徃征
之賊軍射殺所乘馬軍士憤怒奮戈衝擊大破賊軍
十五年從征山東大戰東平馳赴陷陣生挾二將以
還木華黎壯之以功上聞十六年從征延安矢中右
股力戰破之俄又取葭鄜二州擒金梟將金鐵槍以
獻十七年克鳳翔及所屬州郡十八年從帝親征河
西明年下之詔賜吾也而馬五匹甲一事二十年從
木華黎圍益都越二年下三十餘城太宗元年入覲
命與撒里荅火兒赤征遼東下之三年又與撒里荅
征高麗下受開龍宣泰葭等十餘城高麗懼請和吾
也而諭之曰若能以子爲質當休兵十三年遣其子
縛從吾也而來朝帝大悅厚加賜予俾充北京東京
廣寧蓋州平州泰州開元府七路征行兵馬都元帥
佩虎符憲宗元年召問東夷事對曰臣雖老倘藉威
靈指麾三軍敵國猶可克况東夷小醜乎帝壯其言
問飲酒幾何對曰唯所賜時有一駙馬都尉在側素
以酒稱命與之角飲帝大咲賜錦衣名馬俄謝病歸

七年復來朝帝憫其老謂曰自太祖時效勞至今者獨卿無愆賜賚甚厚以都元帥授其中子阿海八年秋九月辛亥夜中星隕帳前光數丈有聲吾也而曰吾死矣明日卒年九十六子四人雪禮最有名太宗時授北京等路達魯花赤至元七年改授招勇大將軍河間路總管

曷思麥里

曷思麥里西域谷則斡兒朶人初爲西遼闊兒罕近侍後爲谷則斡兒朶所屬可散八思哈長官太祖西征曷思麥里率可散等城酋長迎降大將哲伯以聞

帝命曷思麥里從哲伯爲先鋒攻乃蠻克之斬其主曲出律哲伯令曷思麥里持曲出律首徃徇其地若可失哈兒押兒牽斡端諸城皆望風降附又從征你沙不兒城諭下之帝親征至薛迷思干與其主扎刺丁合戰于月亦心揭赤之地敗之追襲扎刺丁等於阿刺黑城戰于禿馬温山又敗之追至憇顏城西寨又敗之扎刺丁逃入于海曷思麥里收其珍寶以還取玉兒谷德痕兩城繼而憇顏城亦下帝遣使趣哲伯疾馳以討欽察命曷思麥里招諭曲兒忒失兒灣沙等城悉降至谷兒只部及阿速部以兵拒敵皆戰

敗而降又降黑林城進擊幹羅思於鐵兒山克之
獲其國主密只思臘哲伯命曷思麥里獻諸木赤太
子誅之尋征康里至孛子八里城與其主霍脫思罕
戰又敗其軍進至欽察亦平之軍還哲伯卒會帝親
征河西曷思麥里持所獲珍寶及七寶繖迎見于阿
刺思不剌思帝顧群臣曰哲伯常稱曷思麥里之功
其軀幹雖小而聲聞甚大就以所進金寶命隨其力
所勝悉賜之仍命與薛徹兀兒爲必闌赤未幾曷思
麥里奏者嘗招安到士卒留亦八里城宜令扈從
征河西許之命常居左右至也吉里海牙又討平失

的兒威從太祖征汴至懷孟令領奧魯事帝由白坡
渡黃河會睿宗兵攻金將合達敗之回駐金蓮川壬
辰授懷孟州達魯花赤佩金符癸巳金將強元帥圍
懷州曷思麥里率其衆及昔里吉思鎖刺海等力戰
金兵退又遣蒲察寒奴乞失烈札魯招諭金總帥范
真率其麾下軍民萬餘人來降己亥六月帝以曷思
麥里從軍西域宣力居多命其長子捏只必襲爲懷
孟達魯花赤次子密里吉襲爲必闌赤令曷思麥里
爲扎魯火赤歸西域大帥察罕行省帖木迭兒奏留
之帝允其請庚子進懷孟河南二十八處都達魯花

元史列傳卷十七
二十七
赤所隸州郡不從命者制令籍其家乙卯五月卒子
密里吉復爲懷孟達魯花赤中統三年從攻淮西與
宋戰死

列傳卷第七

列傳卷第八

元史一百二十一

翰林學士大夫知制誥兼修國史臣
樞密翰林待制承旨同知制誥
樞密院編修官臣
禕等奉
勅修

速不台

速不台蒙古兀良合人其先世獵於斡難河上遇敦
必乃皇帝因相結納至太祖時已五世矣捏里必者
生孛忽都衆目爲折里麻折里麻者漢言有謀略人
也三世孫合赤溫生哈班哈班二子長忽魯渾次速
不台俱驍勇善騎射太祖在班朱尼河時哈班嘗驅
群羊以進遇盜被執忽魯渾與速不台繼至以搶刺

元史列傳卷之六
之人馬皆倒餘黨逸去遂免父難羊得達於行在所
忽魯渾以百戶從帝與乃蠻部主戰於長城之南忽
魯渾射却之其衆奔濶赤檀山而潰速不台以質子
事帝爲百戶歲壬申攻金桓州先登拔其城帝命賜
金帛一車滅里吉部強盛不附丙子帝會諸將於禿
兀刺河之黑林問誰能爲我征滅里吉者速不台請
行帝壯而許之乃選裨將阿里出領百人先行覘其
虛實速不台繼進速不台戒阿里出曰汝止宿必載
嬰兒具以行去則遺之使若挈家而逃者滅里吉見
之果以爲逃者遂不爲備己卯大軍至蟾河與滅里

吉遇一戰而獲其二將盡降其衆其部主霍都奔欽
察速不台追之與欽察戰于玉峪敗之壬午帝征回
回國其主滅里委國而去命速不台與只別追之及
于灰里河只別戰不利速不台駐軍河東戒其衆入
藝三炬以張軍勢其王夜遁復命統兵萬人由不罕
川必里罕城追之凡所經歷皆無水之地既度川先
發千人爲游騎繼以大軍晝夜兼行比至滅里逃入
海不月餘病死盡獲其所棄珍寶以獻帝曰速不台
枕干血戰爲我家宣勞朕甚嘉之賜以大珠銀鑿癸
未速不台上奏請討欽察許之遂引兵繞寬定吉思

海展轉至太和嶺鑿石開道出其不意至則遇其酋
長玉里吉及塔塔哈兒方聚於不租河縱兵奮擊其
衆潰走矢及玉里吉之子逃於林間其奴來告而執
之餘衆悉降遂收其境又至阿里吉河與斡羅思部
大小密赤思老遇一戰降之略阿連部而還欽察之
奴來告其主者速不台縱爲民還以聞帝曰奴不忠
其主肯忠他人乎遂戮之又奏以滅里吉乃蠻怯烈
杭斤欽察諸部千戶通立一軍從之略也迷里霍只
部獲馬萬匹以獻帝欲征河西以速不台比年在外
恐父母思之遣令歸省速不台奏願從西征帝命度

大磧以往丙戌攻下撒里畏吾特勒赤閔等部及德
順鎮戎蘭會洮河諸州得牝馬五千匹悉獻於朝丁
亥聞太祖崩乃還己丑太宗即位以禿滅干公主妻
之從攻潼關軍失利帝責之睿宗時在藩邸言兵家
勝負不常請令立功自効遂命引兵從睿宗經理河
南道出牛頭關遇金將合達帥步騎數十萬待戰睿
宗問以方略速不台曰城居之人不耐勞苦數挑以
勞之戰乃可勝也師集三峯山金兵圍之數匝會風
雪大作其士卒僵仆師乘之殺戮殆盡自是金軍不
能復振壬辰夏睿宗還駐官山留速不台統諸道兵

圍汴癸巳金主渡河北走追敗之於黃龍岡斬首萬餘級金主復南走歸德府未幾復走蔡州汴降俘其
后妃及寶器以獻進圍蔡州甲午蔡州破金主自焚
死時汴梁受兵日久歲饑人相食速不台下令縱其
民北渡以就食乙未太宗命諸王拔都西征八赤蠻
且曰聞八赤蠻有膽勇速不台亦有膽勇可以勝之
遂命爲先鋒與八赤蠻戰繼又令統大軍遂虜八赤蠻
妻子於寬田吉思海八赤蠻聞速不台至大懼逃入
海中辛丑太宗命諸王拔都等討兀魯思部主也烈
班爲其所敗圍秃里思哥城不克拔都奏遣速不台
督戰速不台選哈必赤軍怯憐口等五十人赴之一
戰獲也烈班進攻秃里思哥城三日克之盡取兀魯
思所部而還經哈啞里山攻馬札兒部主怯憐速不
台爲先鋒與諸王拔都吁里兀昔班哈丹五道分進
衆曰怯憐軍勢盛未可輕進速不台出奇計誘其軍
至潮寧河諸王軍於上流水淺馬可涉中復有橋下
流水深速不台欲結棧潛渡繞出敵後未渡諸王先
涉河與戰拔都軍爭橋反爲所乘沒甲士三十人弁
亡其麾下將八哈秃既渡諸王以敵尚衆欲要速不
台還徐圖之速不台曰王欲歸自歸我不至秃納河

馬茶城不還也乃馳至馬茶城諸王亦至遂攻拔之而還諸王來會拔都曰灤寧河戰時速不台救遲殺我八哈秃速不台曰諸王惟知上流水淺且有橋遂渡而與戰不知我於下流結棧未成今但言我遲當思其故於是拔都亦悟後大會飲以馬乳及蒲萄酒言征怯憐時事曰當時所獲皆速不台功也壬寅太宗崩癸卯諸王大會拔都欲不往速不台曰大王於族屬爲兄安得不往甲辰遂會於也只里河丙午定宗即位旣朝會還家于秃刺河上戊申卒年七十三贈効忠宣力佐命功臣開府儀同三司上柱國追封

河南王謚忠定子兀良合台

兀良合台初事太祖時憲宗爲皇孫尚幼以兀良合台世爲功臣家使護育之憲宗在潛邸遂分掌宿衛歲乙巳領兵從定宗征女真國破萬奴於遼東繼從諸王拔都征欽察兀魯思阿孛烈兒諸部丙午又從拔都討孛烈兒乃捏迷思部平之己酉定宗崩拔都與宗室大臣議立憲宗事久未決四月諸王大會定宗皇后問所宜立皆惶惑莫敢對兀良合台對曰此議已先定矣不可復變拔都曰兀良合台言是也議遂定憲宗即位之明年世祖以皇弟總兵討西南夷

烏蠻白蠻鬼蠻諸國以兀良合台總督軍事其鬼蠻
即赤禿哥國也癸丑秋大軍自旦當嶺入雲南境摩
娑二部酋長唆火脫因塔裏馬來迎降遂至金沙江
兀良合台分兵入察罕章蓋白蠻也所在寨柵以次
攻下之獨阿塔刺所居半空和寨依山枕江牢不可
拔使人覘之言當先絕其汲道兀良合台率精銳立
砲攻之阿塔刺遣人來拒兀良合台遣其子阿木迎
擊之寨兵退走遂并其弟阿叔城俱拔之進師取龍
首關翊世祖入大理國城甲寅秋復分兵取附都善
闡轉攻合刺童水城屠之合刺章蓋烏蠻也前次羅
部府大酋高昇集諸部兵拒戰大破之於洩可浪山
下遂進至烏蠻所都押赤城城際滇池三面皆水既
險且堅選驍勇以砲摧其北門縱火攻之皆不克乃
大震鼓鉦進而作作而止使不知所爲如是者七日
伺其困乏夜五鼓遣其子阿木潛師躍入亂斫之遂
大潰至昆澤擒其國王段智興及其渠帥馬合刺昔
以獻餘衆依阻山谷者分命裨將也里脫伯押真掩
其右合台護尉掩其左約三日捲而內向及圍合與
阿木引善射者二百騎期以三日四面進擊兀良合
台陷陣鏖戰又攻織寨拔之至乾德哥城兀良合台

病委軍事於阿木環城立砲以草填塹衆軍始集阿
木已率所部搏戰城上城遂破乙卯攻不花合因阿
合阿因芋城阿木先登取其三城又攻赤秃哥山寨
阿木緣嶺而戰遂拔之乘勝擊破魯廝國塔渾城又
取忽蘭城魯魯廝國大懼請降阿伯國有兵四萬不
降阿木攻之入其城舉國請降復攻阿魯山寨進攻
阿魯城克之乃搜捕未降者遇赤秃哥軍於合打台
山退赴臨崖盡殺之自出師至此凡二年平大理五
城八府四郡洎烏白等蠻三十七部兵威所加無不
款附丙辰征白蠻國波麗國阿木生擒其驍將獻俘

闕下詔以便宜取道與鐵哥帶兒兵合遂出烏蒙趨
瀘江剋秃刺蠻三城却宋將張都統兵三萬奪其船
二百艘於馬湖江斬獲不可勝計遂通道於嘉定重
慶抵合州濟蜀江與鐵哥帶兒會丁巳以雲南平遣
使獻捷於朝且請依漢故事以西南夷悉為郡縣從
之賜其軍銀五千兩綵幣二萬四千匹授銀印加大
元帥還鎮大理遂經六盤山至臨洮府與大營合月
餘復西征烏蠻秋九月遣使招降交趾不報冬十月
進兵壓境其國主陳日熈隔江列象騎步卒甚盛兀
良合台分軍為三隊濟江徹徹都從下流先濟大師

居中駙馬懷都與阿朮在後仍授徹徹都方略曰汝軍既濟勿與之戰彼必來逆我駙馬隨斷其後汝伺便奪其船蠻若潰走至江無船必爲我擒矣師既登岸即縱與戰徹徹都遣命蠻雖大敗得駕舟逸去兀良合台怒曰先鋒違我節度軍有常刑徹徹都懼飲藥死兀良合台入交趾爲久駐計軍令嚴肅秋毫無犯越七日日暎請內附於是置酒大饗軍士還軍押赤城戊午引兵入宋境其地炎瘴軍士皆病遇敵少却亡軍士四人阿朮還戰擒其卒十二人其援復至阿朮以三十騎阿馬禿繼以五十騎擊走之時兀良合台亦病將旋師阿朮戰馬五十疋夜爲禿刺蠻所掠入告兀良合台曰吾馬盡爲盜掠去將何以行即分軍搜訪知有三寨藏馬山顛阿朮親率將士攀崖而上破其諸寨生擒賊酋盡得前後所盜馬千七百疋乃屠押赤城憲宗遣使諭旨約明年正月會軍長沙乃率四王騎兵三千蠻焚萬人破橫山寨闢老蒼關徇宋內地宋陳兵六萬以俟遣阿朮與四王潛自間道衝其中堅大敗之盡殺其衆乘勝擊逐躡貴州蹂象州入靜江府連破辰沅二州直抵潭州城下潭州出兵二十萬斷我歸路兀良合台遣阿朮與大納

卷六
王龍帖木兒軍其前而自與四王軍其後來擊破之
兵自入敵境轉鬪千里未嘗敗北大小十三戰殺宋
兵四十餘萬擒其將大小三人其州又遣兵來攻追
至門濠掩溺殆盡乃不敢復出壁城下月餘時世祖
已渡江駐鄂州遣也里蒙古領兵二千人來援且加
勞問遂自鄂州之澣黃洲北渡與大軍合庚申世祖
即位夏四月兀良合台至上都後十二年卒年七十
二子阿朮自有傳

按竺邇

按竺邇雍古氏其先居雲中塞上父黜公爲金群牧

使歲辛未驅所牧馬來歸太祖終其官按竺邇幼鞠
于外祖朮要甲家訛言爲趙家因姓趙氏年十四隸
皇子察合台部嘗從大獵射獲數麋有二虎突出射
之皆死由是以善射名皇子深器愛之甲戌太祖西
征尋思干阿里麻里等國以功爲千戶丁亥從征積
石州先登拔其城圍河州斬首四十級破臨洮攻德
順斬首百餘級攻鞏昌駐兵秦州太宗即位尊察合
台爲皇兄以按竺邇爲元帥戊子鎮刪丹州自燉煌
置驛抵玉關通西域從定關隴辛卯從圍鳳翔按竺
邇分兵攻西南隅城上礮石亂下選死士先登拔其

城斬金將劉興哥分兵攻西和州宋將彊俊領衆數萬堅壁清野以老我師按竺邇率死士罵城下挑戰俊怒悉衆出陣按竺邇佯走俊追之因以奇兵奪其城伏兵要其歸轉戰數十里斬首數千級擒俊餘衆退保仇池進擊拔之從拔平涼慶陽邠原寧皆降涇州復叛殺守將郭元恕衆議屠之按竺邇但誅首惡師還原州降民棄老幼夜亡走衆曰此必反也宜誅之以警其餘按竺邇曰此輩懼吾驅之比徒耳遣人諭之曰汝等若走以軍法治罪父母妻子併誅矣汝歸保無他明年草青具牛酒迎師於此州民皆復歸

豪民陳苟集數千人潛新寨諸洞衆議以火攻之按竺邇曰招諭不出攻之未晚遂偕數騎抵寨縱馬解弓矢召苟遙語折矢與爲誓苟即相呼羅拜謝更生之恩皆降金人守潼關攻之戰於扇車回不克睿宗分兵由山南入金境按竺邇爲先鋒趨散關宋人已燒絕棧道復由兩當縣出魚關軍沔州宋制置使桂如淵守興元按竺邇假道於如淵曰宋讎金久矣何不從我兵鋒一洗國耻今欲假道南鄭由金洋達唐鄧會大兵以滅金豈獨爲吾之利亦宋之利也如淵度我軍歷境勢不徒還遂遣人導我師由武休關東

抵鄧州西破小關金人大駭謂我軍自天而下其平
章完顏合達樞密使移剌蒲阿帥十七都尉兵數十
萬相拒于鄧我師不與戰直趣鈞州與親王按赤台
等兵合陣三峯山下會天大雪金兵成列按竺邇先
率所部精兵迎擊於前諸軍乘之金師敗績癸巳金
主奔蔡十二月從圍蔡甲午金亡初金將郭斌自鳳
翔突圍出保金蘭定會四州至是命按竺邇往取之
圍斌于會州食盡將走敗之于城門兵入城巷戰死
傷甚衆斌手劔驅其妻子聚一室焚之已而自投火
中有女奴自火中抱兒出泣授人曰將軍盡忠忍使
絕嗣此其兒也幸哀而收之言畢復赴火死按竺邇
聞之惻然命保其孤遂定四州金將汪世顯守鞏州
皇子濶端圍之未下遣按竺邇等往招之世顯率衆
來降皇兄嘉其材勇賞賚甚厚賜名按都拜征行大
元帥丙申大軍伐蜀皇子出大散關分兵令宗王穆
直等出陰平郡期會于成都按竺邇領砲手兵爲先
鋒破宕昌殘階州攻文州守將劉祿數層不下謀知
城中無井乃奪其汲道率勇士梯城先登殺守陴者
數十人遂拔其城祿死之因招徠吐蕃酋長勘陀孟
迦等十族皆賜以銀符畧定龍州遂與大散軍合進

克成都師還而成都復叛丁酉按竺邇言於宗王曰隴州縣方平人心猶貳西漢陽當隴蜀之衝宋及吐蕃利於入寇宜得良將以鎮之宗王曰安反側制寇賊此上策也然無以易汝遂分蒙古千戶五人隸麾下以往按竺邇命侯和尚南戍沔州之石門朮魯西戍階州之兩水謹斥侯嚴巡邏西南諸州不敢犯之戊戌從元帥塔海率諸翼兵伐蜀克隆慶己亥攻重慶庚子圖萬州宋人將舟師數百艘遡流迎戰按竺邇順流率勁兵乘巨筏浮草舟於其間弓弩兩射宋人不能敵敗諸夔門辛丑伐西川破二十餘城成都守將田顯開北門以納師宋制置使陳隆之出奔追獲之縛至漢州令誘降守將王夔夔不降進兵攻之夔夜驅火牛突圍出奔遂斬隆之壬寅會大軍破遂寧瀘叙等州癸亥破資州庚戌按竺邇安輯涇邠二州宋制置使余玠攻興元文州降將王德新乘隙自階州叛執扈牛二鎮將領衆千餘走江油憲宗召按竺邇還舊鎮按竺邇遣將直擣江油奪扈牛以歸中統元年世祖即位親王有異謀者其將阿藍荅兒渾都海圖擾關隴時按竺邇以老委軍於其子帝遣宗王哈丹哈必赤阿曷馬西討按竺邇曰今內難方殷浸

亂關隴豈臣子安卧之時耶吾雖老尚能破賊遂引
兵出刪丹之耀碑谷從阿曷馬與之合戰會大風晝
晦戰至晡大敗之斬馘無算按竺邇與總帥汪良臣
獲阿藍荅兒渾都海等捷聞帝錫璽書褒美賜弓矢
錦衣四年卒年六十九延祐元年贈推忠佐運功臣
太保儀同三司上柱國封秦國公謚武宣子十人徹
理國寶最知名徹理襲職為元帥丁巳從父攻瀘州
降宋將劉整宋將姚德壁雲頂山戊午大軍圍之徹
理率部兵由水門先登破其壁德降後以病廢卒國
寶一名黑梓少擊劔學書個儻好義有謀畧父為元

帥軍務悉以委之故所至多捷從攻重慶降宋都統
張實併掠合州以歸中統元年從攻阿藍荅兒有功
阿藍荅兒叛將火都擾吐蕃之點西嶺國寶攝帥事
討之衆欲速戰國寶曰此窮寇也宜少緩以計破之
遂以精兵襲其後火都欲西走國寶擾險要之挑戰
則斂兵自固相持兩月潛兵出其不意擒殺之捷聞
賜弓矢金綺初按竺邇之告老制命徹理襲征行元
帥徹理以病不視事國寶乃謂諸弟曰昔我先人耀
兵西陲大功既集關隴雖寧而西戎未靖此吾輩立
功之秋也乃遣謝鼎與弟國能持金帛說降吐蕃酋

長勘陀孟迦從國寶入覲國寶奏曰文州山川險阨
控庸蜀拒吐蕃宜城文州屯兵鎮之從之授國寶三
品印爲蒙古漢軍元帥兼文州吐蕃萬戶府達魯花
赤與勘陀孟迦皆賜金符時扶州諸羌未附國寶宣
上威德於是呵哩禪波哩揭諸酋長皆歸款從國寶
入覲國寶圖山川形勢以獻詔授呵哩禪波哩揭爲萬
戶賜金虎符諸酋長爲千戶皆賜金符賜國寶金幣國
寶治文州有善政至元四年卒延祐元年贈推誠佐理
功臣光祿大夫平章政事柱國封梁國公謚忠定子世
榮世延初國寶將卒以世榮幼命弟國安襲其職國
安既襲蒙古漢軍元帥兼文州吐蕃萬戶府達魯花
赤後以其兄國寶安邊功賜金虎符進昭勇大將軍
十五年討叛王吐魯于六盤獲之請解職授世榮帝
曰人爭而汝讓可以敦薄俗錄其六盤功進昭毅大
將軍招討使世榮襲懷遠大將軍蒙古漢軍元帥兼
文州吐蕃萬戶府達魯花赤後以功進安遠大將軍
吐蕃宣慰使議事都元帥佩三珠虎符世延中書平
章政事

畏谷兒

畏谷兒忙兀人其先刺真八都兒有二子次名忙兀

兒始別爲忙兀氏畏荅兒其六世孫也與兄畏翼俱事太祖時大疇強盛畏翼率其屬歸之畏荅兒力止之不聽追之又肯還畏荅兒乃還事太祖太祖曰汝兄既去汝獨留此何爲畏荅兒無以自明取矢折而誓曰所不終事主者有如此矢太祖察其誠更名爲薛禪約爲按達薛禪者聰明之謂也按達者定交不易之謂也太祖與克烈王罕對陳於哈刺真師少不敵帝命兀魯一軍先發其將朮徹台橫鞭馬鬣不應畏荅兒奮然曰我猶鑿也諸君斧也鑿匪斧不入我請先入諸軍繼之萬一不還有三黃頭兒在唯上念之遂先出陷陣大敗之至晡時猶追逐不已敕使止之乃還腦中流矢創甚帝親傅以善藥留廐帳中月餘卒帝深惜之及王罕滅帝以其將只里吉實抗畏荅兒乃分只里吉實民百戶隸其子且使世世歲賜不絕仍令收完忙兀人民之散亡者太宗思其功復以北方萬戶封其子忙哥爲郡王歲丙申忽都忽大料漢民分城邑以封功臣授忙哥泰安州民萬戶帝訝其少忽都忽對曰臣今差次惟視舊數多寡忙哥舊纔八百戶帝曰不然長荅兒封戶雖少戰功則多其增封爲二萬戶與十功臣同爲諸侯者封戶皆

異其籍兀魯爭曰忙哥舊兵不及臣之半今封願多於臣帝曰汝忘而先橫鞭馬鬣時耶兀魯遂不敢言忙哥卒孫只里瓦解乞答解曾孫忽都忽兀乃忽里哈赤俱襲封為郡王

博羅歡

伯都

博羅歡畏答兒幼子蘸木曷之孫瑣魯火都之子也時諸侯王及十功臣各有斲事官博羅歡年十六為本部斲事官從世祖討阿里不哥數有功帝喜而賜馬四十匹金幣稱之中統三年李璿叛命帥忙兀一軍圍濟南分兵掠益都萊州悉平之詔錄燕南獄讞

決明乞賜衣一襲皇子雲南王愛哥亦為其省臣寶合丁毒死事覺中書擇可治其獄者四人奏上皆不稱旨丞相線真以博羅歡聞帝可其奏博羅歡辭曰臣不敢愛死第年少不知書恐誤事耳帝乃以吏部尚書別帖木兒輔其行未至雲南寶合丁密以金六籠迎餽祈勿究其事博羅歡慮其握兵徼外拒之恐致變陽諾曰吾橐不能容可且持歸待我取之博羅歡至則竟其獄誅毒王者而歸其金于省陛見帝願謂線真曰卿舉得其人矣賜黃金五十兩詔忙兀事無大小悉統於博羅歡授昭勇大將軍右衛親軍都

指揮使大都則專右衛上都則兼三衛會伐宋授金
吾衛上將軍中書右丞詔分大軍為二右軍受伯顏
阿木節度左軍受博羅歡節度俄兼淮東都元帥罷
山東經畧司而以其軍悉隸焉遂軍于下邳召將佐
謀曰清河城小而固與昭信淮安泗州為犄角猝未
易拔海州東海石秋遠在數百里之外必不嚴備吾
頓大兵為疑兵以輕騎倍道襲之其守將可擒也師
至三城果皆下清河亦降宋主以國內附而淮東諸
城猶為之守詔博羅歡進軍拔淮安南堡戰白馬湖
及寶應掠高郵自西小河入漕河援灣頭斷通泰援
兵遂下揚州淮東平益封桂陽德慶二萬一千戶十
四年討叛臣只里幹台於德昌平之賜王帶文綺與
博羅同署樞密院事拜中書右丞行省北京未幾召
還時江南新附尚多反側詔募民能從大軍進討者
使自為一軍聽節度於其長而毋役於他軍制命符
節皆與正同會博羅歡寢疾乃附樞密董文忠奏曰
今疆土寢廣勝兵百萬指揮可集何假此無藉之徒
彼一踐南土則掠人貨財俘人妻孥仇怨益滋而叛
者將愈衆矣奏上召輿疾賜坐與語帝大悟遂可其
奏而常德入訖唐兀一軍殘暴其境內敕斬以徇凡

所募軍皆罷十六年以哈刺斯博羅思幹羅罕諸部
不相統命博羅歡監之十七年以中書右丞行省甘
肅二十年拜御史大夫行御史臺事以疾歸諸王乃
顏叛帝將親征博羅歡諫曰昔太祖分封東諸侯其
地與戶臣皆知之以二十為率乃顏得其九忙兀兀
魯扎刺兒弘吉刺亦其烈思五諸侯得其十一惟徵
五諸侯兵自足當之何至上煩乘輿哉臣疾且愈請
事東征帝乃賜鎧甲弓矢鞍勒命督五諸侯兵與乃
顏戰敗之其黨塔不帶以兵來拒會久雨軍乏食諸
將欲退博羅歡曰今兩陣相對豈容先動俄塔不帶

引兵退博羅歡以其師乘之轉戰二日身中三矢大
破之斬其駙馬忽倫適太師月魯那演大軍來會遂
平乃顏擒塔不帶既而其黨哈丹復叛詔與諸侯王
乃馬帶討之哈丹游騎猝至博羅歡從三騎返走抵
絕澗可二丈許追騎垂及博羅歡策其馬一躍而過
三從騎皆沒人以爲有神助云哈丹死斬其子老的
於陳往返凡四歲凱旋俘哈丹二妃以獻敕以一賜
乃馬帶一賜博羅歡陳其金銀器於延春閣上召諸
侯王將帥分賜之博羅歡辭帝曰卿可謂能讓乃賜
金銀器五百兩以旌之河南宣慰改行中書省拜平

章政事有詔括馬母及勲臣之家博羅歡曰吾馬成
群所治地方三千里不先出馬何以爲吏民之倡乃
先入善馬十有八汴南諸州莽爲巨浸博羅歡躬行
決口督有司繕完之三十一年成宗立遷陝西行中
書省平章政事未行留鎮河南入朝請以泰安州所
入五戶絲四千斤易內庫繒帛分給忙兀一軍帝爲
教迺車送軍中賜以銀百五十兩陞辭帝諭之曰卿
今白鬚世祖德言寔多聞之宜加慎護因以世祖所
佩弓矢擊帶賜之有頃近臣奏伐宋時右軍分屬伯
顏阿朮左軍分屬博羅歡今伯顏阿朮皆受分地而

博羅歡未及惟帝裁之帝曰何久不言豈彼耻自請
耶乃益封高郵五百戶大德元年叛王藥朮忽兒兀
魯速不花來歸博羅歡聞之遣使馳奏曰諸王之叛
皆由其父此輩幼弱無所與知今茲來歸宜棄其前
惡以勸未至帝深以爲然賜金鞍勒命以平章政事
行省湖廣會并福建行省入江浙拜光祿大夫上柱
國江浙等處行中書省平章政事居歲餘卒年六十
三博羅歡勇有智畧戰常以身先之所獲財物悉與
將士故得其死力平居常以國事爲憂聞變即請行
至終其事乃止其忠義蓋天性然也累贈推忠宣力

賈運功臣太師開府儀同三司上柱國加封奉安王
謚武穆子渾都伯都楚先帖木兒博羅渾都山東宣
慰使遥授中書平章政事楚先帖木兒河南江北等
處行中書省左丞相卒官開府儀同三司翰林學士
承旨博羅陝西等處行中書省平章政事楚先帖木
兒子尼摩星吉襲郡王亦思刺瓦性吉中政使

伯都幼穎異不以家世自矜長嗜書史大德五年擢
江東道廉訪副使拜江南行臺侍御史未幾召入僉
樞密院事領舍兒別赤至大二年出為江南行臺御
史中丞遷陝西行臺御史大夫延祐元年拜甘肅行

省平章政事時米價騰湧陸軌每石費二百緡乃為
經畫計所省至四百餘萬緡自是諸倉俱充溢甘州
氣寒地瘠少稔歲民饑則發粟賑之春闕種則貸之
於是兵饟既足民食亦給詔賜名鷹甲冑弓矢及鈔
五千緡以勞焉四年移江浙行省平章政事入為太
子賓客上書陳古先聖王正心脩身之道帝嘉納之
遷江南行臺御史大夫皇太后謂東宮官不宜使外
止其行遂以疾辭去寓居高郵英宗即位復命為江
南行臺御史大夫陞見以疾固辭帝慰諭久之命以
平章之祿歸養于家復賜鈔十萬緡所服藥須空青

詔遣使江南訪求之伯都辭謝曰臣曩膺重寄深懼弗稱今已病廢况敢叨濫厚祿以受重賜乎併以所給平章政事祿歸有司泰定元年還京師卒朝廷知其貧賻鈔二萬五千貫御史臺奏賻三萬五千貫仍還所辭祿妻弘吉刺氏弗受曰始伯都仕于朝不敢虛受廩祿今歿矣苟受是祿非其意也卒辭之子篤爾只將作院判官

抄思

抄思乃蠻部人又號曰荅祿其先秦陽爲乃蠻部主祖曲書律父敞温太祖舉兵討不庭曲書律失其部

落敞温奔契丹卒抄思尚幼與其母跋涉間行歸太祖奉中宮旨侍宮掖抄思年二十五即從征伐破代石二州不避矢石每先登焉鴈門之戰屢捷會太宗命睿宗平金抄思執銳以從與金兵戰所向無前壬辰兵次釣州金兵壘于三峯山抄思察其營壁不堅夜領精騎襲之金兵驚擾遂乘擊之拔三峯山睿宗以抄思功聞于朝有旨以湯陰縣黃招撫等一百一十七戶賜之抄思力辭不受復賜以男女五十口完一區黃金鞶帶酒壺盃盂各一辭弗許迺受之制受萬戶與內侍胡都虎留乞僉起西京等處軍人征行

及鎮守隨州招集民戶每千人以官一員領之丁酉
秋七月奉旨調軍得西京大名濱棣懷孟真定河間
邢洛磁威新衛保等府州軍四千六十餘人統之後
移鎮穎以疾歸大名歲戊申正月卒年四十四子別
的因

別的因在襁褓時父抄思方領兵平金與其祖母康
里氏在三皇后宮庭戊申父抄思卒母張氏迎別的
因以歸祖母康里氏卒張嘗從容訓之曰人有三成
人知畏惧成人知羞耻成人知艱難成人否則禽獸
而已別的因受教唯謹甲寅世祖以宗王鎮黑水有

旨諭察罕那顏命別的因襲抄思職為副萬戶鎮守
隨穎等處丙辰冬十有二月世祖復諭征鎮軍士悉
聽別的因等號令別的因身長七尺餘肩豐多力善
刀舞尤精騎射士卒咸畏服之明年庚申世祖即位
委任尤專癸亥正月召赴行在所冬十一月謁見世
祖於行在所世祖賜金符以別的因為壽穎二州屯
田府遼魯花赤時二州地多荒蕪有虎食民妻其夫
來告別的因默然良久曰此易治耳廼立檻設機縛
羔羊檻中以誘虎夜半虎果至機發虎墮檻中因取
射之虎遂死自是虎害頓息至元十三年授明威將

軍信陽府達魯花赤佩金符時信陽亦多虎別的因
至未久一日以馬褻置鞍上出獵命左右燔山虎出
走別的因以褻擲虎虎搏褻據地而吼別的因旋馬
視虎射之虎立死十六年進宣威將軍常德路副達
魯花赤會同知李明秀作亂別的因請以單騎往招
之直抵賊壘賊輕之不設備別的因諭以朝廷恩德
使爲自新計明秀素畏服遂與俱來別的因聞于朝
明秀伏誅賊遂平三十一年進懷遠大將軍遷池州
路達魯花赤之官道經潁上潁近荆山有野豕時出
害民禾稼民莫能制聞別的因至迎拜境上告以其
故別的因曰毋慮也遂至荆山以狼牙箭射之豕走
數里大德三年進昭勇大將軍台州路達魯花赤卒
年八十一子不花僉嶺南廣西道肅政廉訪司事文
圭有隱德贈秘書監著作郎延壽湯陰縣達魯花赤
孫守恭曾孫與權皆讀書登進士科人多稱之

列傳卷第八

列傳卷第九

元史二百二十二

翰林學士中大夫知制誥兼修國史臣宋濂翰林待制奉直閣知制誥兼國史院編修官禕董奉勅修

巴而木阿而忒的斤

巴而木阿而忒的斤亦都護亦都護者高昌國主號也先世居畏兀兒之地有和林山二水出焉曰禿忽刺曰薛靈哥一夕有神光降于樹在兩河之間人即其所而候之樹乃生瘦若懷妊狀自是光常見越九月又十日而樹瘦裂得嬰兒者五土人收養之其最稚者曰不可罕既壯遂能有其民人土田而為之君

長傳三十餘君是爲玉倫的斤數與唐人相攻戰久之議和親以息民罷兵於是唐以金蓮公主妻的斤之子葛勵的斤居和林別力跋力答言婦所居山也又有山曰天哥里于答哈言天靈山也南有石山曰胡力答哈言福山也唐使與相地者至其國曰和林之盛彊以有此山也盍壞其山以弱其國乃告諸的斤曰既爲婚姻將有求於尔其與之乎福山之石於上國無所用而唐人願見的斤遂與之石大不能動唐人以烈火焚之沃以醲醋其石碎乃輦而去國中鳥獸爲之悲號後七日玉倫的斤卒災異屢見民弗

安居傳位者又教亡乃遷於交州交州即火州也統別失八里之地北至阿木河南接酒泉東至兀敦甲石哈西臨西蕃居是者九百七十餘載而至巴而木阿而忒的斤臣於契丹歲已巳聞太祖興朔方遂殺契丹所置監國等官欲來附未行帝遣使使其國亦都護大喜即遣使入奏曰臣聞皇帝威德即奔契丹舊好方將通誠不自意天使降臨下國自今而後願率部衆爲臣僕是時帝征大陽可汗射其子脫脫殺之脫脫之子大都赤刺温馬札兒禿薛干四人以不能歸全屍遂取其頭涉也死的石河將奔亦都護先

遣使往亦都護殺之四人者至與大戰於禡河亦都
護遣其國相來報帝復遣使還諭亦都護遂以金寶
入貢辛未朝帝于怯綠連河奏曰陛下若恩顧臣使
臣得與陛下四子之末庶幾竭其犬馬之力帝感其
言使尚公主也立安敦且得序於諸子與者必那演
征罕勉力鎖潭回回諸國將部曲萬人以先紀律嚴
明所向克捷又從帝征你沙卜里征河西皆有大功
既卒而次子玉古倫赤的斤嗣王古倫赤的斤卒子
馬木刺的斤嗣將探馬軍萬人從憲宗伐宋合州攻
釣魚山有功還火州卒至元三年世祖命其子火赤

哈兒的斤嗣爲亦都護海都帖木迭兒之亂畏兀兒
之民遭亂解散於是有旨命亦都護收而撫之其民
人在宗王近戚之境者悉遣還其部畏兀兒之衆復
輯十二年都哇卜思巴等率兵十二萬圍火州聲言
曰阿只吉奧魯只諸王以三十萬之衆猶不能抗我
而自潰尔敢以孤城當吾鋒乎亦都護曰吾聞忠臣
不事二主吾生以此城爲家死以此城爲墓終不能
從尔也受圍凡六月不解都哇以書繫矢射城中曰
我亦太祖皇帝諸孫何以不附我且尔祖嘗尚公主
矣尔能以女與我我則休兵不然則急攻尔其民相

與言曰城中食且盡力已困都哇攻不止則相與俱
亡矣亦都護曰吾豈惜一女而不以救民命乎然吾
終不能與之相見以其女也立亦黑迷失別吉厚載
以茵引繩縋城下而與之都哇解去其後入朝帝嘉
其功錫以重賞妻以公主曰巴巴哈兒定宗之女也
又賜鈔十萬錠以賑其民還鎮火州屯於州南哈密
力之地兵力尚寡北方軍忽至其地大戰力盡遂死
之子紐林的斤尚幼詣闕請兵北征以復父讎帝壯
其志賜金幣巨萬妻以公主曰不魯罕太宗之孫女
也公主薨又尚其妹曰八卜义有旨師出河西俟北

征諸軍齊發遂留求昌會吐蕃脫思麻作亂詔以榮
祿大夫平章政事領本部探馬等軍萬人鎮吐蕃宣
慰司威德明信賊用歛迹其民賴以安武宗召還嗣
爲亦都護賜之金印復署其部押西護司之官仁宗
始稽故實封爲高昌王別以金印賜之設王傳之官
其王印行諸內郡亦都護印行諸畏兀兒之境八卜
义公主薨復尚公主曰兀刺真安西玉之女也領兵
火州復立畏兀兒城池延祐五年薨子二人長曰帖
木兒補化次曰錢吉皆八卜义公主所生也帖木兒
補化大德中尚公主曰朶兒只思蠻闊端太子孫女

也至大中從父入覲備宿衛又事皇太后於東朝拜中奉大夫領大都護事又以資善大夫出為鞏昌等處都總帥達魯花赤奔父喪於永昌請以王爵讓其叔父欽察台叔父力辭乃嗣為亦都護高昌王至治中領甘肅諸軍仍治其部泰定中召還與威順王寬徹不花宣靖王買奴靖安王闊不花分鎮襄陽俄拜開府儀同三司湖廣行省平章政事文宗召至京師佐平大難時湖廣左丞有以忌嫉害政者詔命誅之帖木兒補化乃為申請曰是誠有罪然不至死人服其雅量天曆元年拜開府儀同三司上柱國錄軍國

重事知樞密院事明年正月以舊宮勲封拜中書左丞相三月加太子詹事十月拜御史大夫其弟籤吉乃以讓嗣為亦都護高昌王

鐵邁赤

虎都 鐵木祿 塔海

鐵邁赤合魯氏善騎射初事忽蘭皇后帳前嘗命為搆馬官從太祖定西夏又從皇子闊出忽都行省鐵木答兒定河南累有戰功憲宗之伐宋也世祖以皇弟受命攻鄂大駕征西川遣元帥兀良哈台自交趾擣宋與諸軍合歲己未皇弟駐兵鄂渚聞兀良哈台由廣西至長沙遣鐵邁赤將練卒千人鐵騎三千迎

兀良哈台于岳州兀良哈台得援抵江夏北涉黃州鐵邁赤與有力馬世祖即位命從征叛王于失木土之地勞績益著至元七年授蒙古諸萬戶府奧魯總管十九年以疾卒子八人虎都鐵木祿最顯

虎都鐵木祿好讀書與學士大夫遊字之曰漢卿仁宗嘗顧左右曰虎都鐵木祿字漢卿漢名卿不讓也汝等以漢卿名之宜矣其母姓劉氏故人又稱之曰劉漢卿云至元十一年從丞相伯顏渡江既取宋遣視宋故宮室護帑藏諭下明越等州從平章奧魯入覲授忠顯校尉總把再轉昭信校尉二十二年授奉

訓大夫荆湖占城等處行中書省理問官時行省之名曰荆湖占城曰荆湖曰湖廣凡三改理問一日以軍事入奏敷陳辨白有指趣世祖大悅若曰辭簡意明令人樂於聽受昔以其兄阿里警敏捷給令侍左右斯人顧不勝耶勅都護脫因納志之平章政事程鵬飛建議征日本奏漢卿為征東省郎中帝顧脫因納若曰鵬飛南士也猶知其能姑聽之候還朕自錄任征東省罷徵漢卿還丞相阿里海牙以湖廣行省機密事重舍漢卿無可用者遣郎中岳洛也奴奏留從之二十一年從皇子鎮南王征交趾比還鄂時權

臣方擅威福遂退處于家二十八年詔太傅右丞相
順德王谷刺罕擒權姦于鄂答刺罕遂拜湖廣行中
書省平章政事詢舊人知方面之務者衆薦漢卿遣
使即南陽家居驛致武昌奏事京師帝嘉之擢給事
中居再歲提刑按察司改肅政廉訪司臺臣奏授奉
議大夫廣西海北道副使陞辭留之仍舊職既而湖
廣行省平章政事劉傑奏伐交趾造戰舡五百于廣
東帝曰此重事也須才幹臣乃濟用以漢卿督匠南
方勅曰汝還當顯汝于衆因頓首謝事既集帝崩遷
福建行省郎中朝列大夫漢陽監府中順大夫湖南

宣慰副使峒酋岑雄叛奉詔開諭頑獷怙服改太中
大夫河南行中書省郎中通議大夫同僉樞密院事
拜禮部尚書大臣奏覈實江南民田漢卿奉詔使江
西以田額舊定重擾民不便置不問止奏茶漕置局
十有七所以七品印章敕授局官五十一員增中統
課緡五十萬轉正議大夫兵部尚書未幾命爲中奉
大夫荆湖北道宣慰使已命復留之延祐三年大臣
以浙東倭奴商舶貿易致亂奏遣漢卿宣慰閩浙撫
戢兵民海陸爲之靜謐云從子塔海
塔海漢卿兒子也世祖時從土土哈克哈刺赤至元

二十四年扈駕征乃顏二十六年入覲帝命充寶兒赤扈駕至和林賜只孫冠服大德四年授中書直省舍人遷中書客省副使武宗即位賜中統鈔五百錠以旌其能尋進和林行省理問所官改通政僉院歷和寧路總管改汴梁先是朝廷令民自實田土有司繩以峻法民多虛報以塞命其後差稅無所於徵民多逃竄流移者塔海以其弊言于朝由是省民間虛糧二十二萬民賴以安後改任廬州時有飛蝗北來民患之塔海禱于天蝗乃引去亦有墮水死者人皆以爲異民乏食開廩減直俾民糴之所活甚衆天曆元年冬十月樞密院臣奏以塔海充樞密僉院守潼關及河中府帝遣人馳賜白金鈔幣宣授僉書樞密院事未幾西軍犯南陽督諸衛兵往平之至其地首率勇士與帖木哥等戰摧其前鋒將奪其旗鼓西軍敗走賜三珠虎符進大都督累官資善大夫

按扎兒

按扎兒拓跋氏嘗扈從太祖南征歲丙子復從定諸部有功命領蒙古軍爲前鋒時木華黎暨博爾朮爲左右萬戶長各以其屬爲翊衛太祖命木華黎爲太師國王都行省承制行事兵臨燕遼營青齊魯趙韓

魏皆下歲己卯河中府降兵北還以按扎兒領前鋒
總帥仍統所部兵屯平陽以備金攝國王事時金將
乞石烈氏擁兵數萬為邊患然畏按扎兒威名不敢輕
犯其境歲壬午元帥石天應守河中府屯中條山金
候將軍率昆弟兵十餘萬夜襲河中天應遣偏裨吳
權府率五百兵出東門伏兩谷關諭之曰俟其半過
即翼擊之俾腹背受敵即成禽矣吳醉敵至聲援弗
繼城遂陷天應死焉遂燔其城屠其民將趨中條按
扎兒進兵擊之斬首數萬級逃免者僅十數歲癸未
春至聞喜縣西下馬村木華黎卒詔以子孛魯襲其

爵時平陽重地令按扎兒居守歲庚寅孛魯由雲中
圍緯州金將武仙恐退保潞東十餘里原上孛魯馳
至沁南未立鼓乞石烈引兵襲其後孛魯戰失利輜
重人口皆陷沒按扎兒妻奴丹氏亦被獲拘于大梁
金主聞按扎兒威名召奴丹氏見奴丹氏色莊言正
不為動金主因謂之曰今縱爾還能偕爾夫來當厚
賞尔奴丹氏佯諾之遂得還太宗聞而義之召見褒
賚甚厚遂詔預其夫前鋒事帝率從弟按只吉歹口
溫不花大王皇弟四太子暨國王孛魯征潞州鳳翔
至鈞州三峯山金將完顏合達引兵十五萬來戰俘

其同僉移剌不花等悉誅之明年壬辰春三月帝班師北還命偕都元帥唆伯台圍汴城中識按扎兒旗幟懼曰其妻猶勇且義況其夫乎歲甲午金亡詔封功臣賜平陽戶六百一十有四驅戶三十獵戶四未幾以疾卒子忙漢拙赤哥至元十五年忙漢爲管軍千戶二十四年從征乃顏二十六年從征海都二十七年宣授蒙古侍衛親軍千戶佩金符元貞元年有旨命領探馬赤軍偕哈伯元帥從宗王出伯西征改授昭信校尉右都威衛千戶大德元年召還至大四年卒子乃蠻襲拙赤哥入宿衛從世祖征鄂漢以功賜白金至元三年從征李璫戰死之子闊闊木爲御史臺都事至元三十一年國王速渾察之子拾得既沒其家有故璽王將鬻之命闊闊木以示中丞崔或御史楊桓辯其文曰受命于天既壽永昌蓋秦璽也或請獻之徽仁裕聖皇后后以鈔二千五百貫賜拾得家金織文段二賜闊闊木成宗即位近臣以其事聞授闊闊木漢中廉訪僉事仕至湖南廉訪使

雪不台

雪不台蒙古部兀良罕氏遠祖捏里弼生孛忽都雄勇有智畧曾孫合飭溫生哈班哈不里哈班生二子

長虎魯渾次雪不台太祖初建興都于班朱泥河今龍居河也哈班驅羣羊入貢遇盜見執雪不台及兄虎魯渾隨至刺盜殺之衆潰去哈班得以羊進帝所由是父子兄弟以義勇稱虎魯渾以百夫長西征破乃蠻立戰功雪不台以質子襲職七年攻桓州先登下其城賜金幣凡一車十一年戰滅里吉衆于蟾河追其部長玉峪大破之遂有其地扈從征回鶻其主棄國去雪不台率衆追之回鶻竟走死其帑藏之積盡入內府賜寶珠一銀罌十八年討定欽察鏖戰斡羅思大小密赤思老降之奏滅里吉乃蠻怯烈斤欽察部千戶通立一軍十九年獻馬萬疋二十一年取馭里畏吾特勤赤憫等部德順鎮戎蘭會洮等州獻牝馬三千疋太宗二年大舉伐金渡河而南睿宗以太弟將兵渡漢水而北會河南之三峯山金大臣合禱禱諸將步騎數十萬待戰雪不台從睿宗出牛頭關謀曰城邑兵野戰不利易破耳師集三峯金圍之數匝將士頗懼俄而風雪大作金卒僵踣士氣遂奮敵衆盡殪河南諸州以次降破四年夏雪不台總諸道兵攻汴金義宗走衛州又走歸德又走蔡州癸巳秋汴將以城降其冬攻蔡六年春金亡雪不台以汴民饑

縱使渡河就食民德之是年詔宗王拔都西征雪不台爲先鋒戰大捷十三年討兀魯思部主野力班禽之攻馬劄部與其酋怯憐戰鄯寧河遣偏師由下流擣其城拔之是時北庭西域河南北關隴皆底定雪不台功力居多初太祖征西夏閱其久於行間敕還省覲雪不台對曰君勞臣佚情所未安帝壯而聽之又金帥合達見獲以不屈死猶問雪不台安在請一識之雪不台出謂曰汝須更人耳識我何爲曰人臣亦各爲其主卿勇蓋諸將天生英豪其偶然邪吾見卿甘心瞑目矣定宗三年卒於薦列河之地年七十有三至大元年贈効忠宣力佐命功臣開府儀同三司上柱國河南王謚忠定

唵木海

唵木海蒙古八剌忽解氏與父孛合出俱事太祖征伐有功帝嘗問攻城畧地兵仗何先對曰攻城以砲石爲先力重而能及遠故也帝悅即命爲砲手歲甲戌太師國王木華黎南伐帝諭之曰唵木海言攻城用砲之策甚善汝能任之何城不破即授金符使爲隨路砲手達魯花赤唵木海選五百餘人教習之後定諸國多賴其力太宗即位留爲近侍以講武藝歲

壬辰從攻河南有功壬子憲宗特授虎符陞都元帥
癸丑從宗王旭烈兀征刺里西番斜巨山桃里寺河
西諸部悉下之卒子忒木台兒以從戰功授金符襲
砲手總管至元十年修立正陽東西二城置砲二百
餘座與宋人戰却之十三年從丞相伯顏伐宋駐軍
臨安之臯亭山同忙古歹等八人率甲三百入宋宮
取傳國寶宋太后請解兵延見內殿期明日奉寶乞
降至期果遣賈餘慶等奉寶至軍前以功授行省斷
事官復令其子忽都答兒襲砲手總管十四年進昭
勇六將軍砲手萬戶佩元降虎符鎮平江之常熟有
叛民擁衆自號太尉者行省會諸軍討之與忽都答
兒父子自爲一軍奮戈陷陣斬賊酋戴太尉擒朱太
尉帝嘉其功十五年兼平江路達魯花赤尋遷徽州
湖州卒忽都答兒後陞砲手萬戶改授達魯花赤卒

昔里鈐部

昔里鈐部唐兀人昔里氏鈐部亦云甘卜音相近而
互用也太祖時西夏既臣服大軍西征復懷貳心帝
聞之旋師致討命鈐部同忽都鐵穆兒招諭沙州州
將僞降以牛酒犒師而設伏兵以待之首帥至伏發
馬躡鈐部以所乘馬與首帥使奔自乘所躡馬而殿

後擊敗之他日帝聞曰卿臨死地而易馬與人何也
鈐部對曰小臣陣死不足重輕首帥乃陛下器使宿
將不可失也帝以爲忠進兵圍肅州守者乃鈐部之
兄懼城破害及其家先以爲請帝怒城久不下有旨
盡屠之惟聽鈐部求其親族家人於死所於是得免
死者百有六戶歸其田業歲乙未定宗憲宗皆以親
王與速卜帶征西域明年啓行鈐部亦在中又明年
至寬田吉思海鈐部從諸王拔都征斡羅斯至也里
替城大戰七日拔之己亥冬十有一月至阿速滅怯
思城負固久不下明年春正月鈐部率敢死士十人

躡雲梯先登俘十一人大呼曰城破矣衆蟻附而上
遂拔之賜西馬西錦錫名拔都明年班師授鈐部千
戶賜只孫爲四時宴服尋遷斷事官丙午定宗即位
進秩大名路達魯花赤憲宗以下只兒來蒞行臺命
鈐部同署既又別錫虎符出監大名己未世祖南征
供給軍餉未嘗乏絕以疾輿歸卒于家年六十九子
愛魯

愛魯襲爲大名路達魯花赤至元五年從雲南征金
齒諸部蠻兵萬人絕縹緲道擊之斬首千餘級諸部
震服六年再入定其租賦平火不麻等二十四砦得

七馴象以還七年改中慶路達魯花赤兼管爨棘軍
 十年平章賽典赤行省雲南令愛魯疆理永昌增田
 為多十一年閱中慶版籍得隱戶萬餘以四千戶即
 其地屯田十三年詔開烏蒙道帥師至玉連等州所
 過城砦未附者盡擊下之水陸皆置驛傳由是大為
 賽典赤信任十四年忙部也可不薛叛以兵二千討
 平之遷廣南西道左右兩江宣撫使兼招討使十六
 年遷雲南諸路宣慰使副都元帥十七年復立雲南
 行省拜參知政事十八年烏蒙羅佐山白水江蠻殺
 萬戶阿忽以叛復討平之十九年召詣闕進左丞也

可不薛復叛詔與西川都元帥也速答兒湖南行省
 脫里察會師進討禽也可不薛送京師仁普諸酋長
 皆降得戶四千諸王相吾兒帥諸將征緬愛魯供餽
 餉無乏絕二十二年烏蒙阿謀殺宣撫使以叛與右
 丞拜答兒徃征之拜答兒以愛魯習知其山川道里
 令諸軍悉聽指授分道進擊生擒阿蒙以歸二十四
 年進右丞朝廷立尚書省復改行尚書右丞鎮南王
 征交趾詔愛魯將兵六千人從之自羅羅至交趾境
 交趾將昭文王以兵四萬守木元門愛魯與戰破之
 擒其將黎石何英比三月大小一十八戰乃至其王

徐冲明

三九十四
城與諸軍會戰又二十餘合功爲多二十五年感瘴
癘卒贈平章政事謚毅敏子教化中書平章政事請
于朝贈其祖昔里鈐部太師謚貞獻加贈愛魯太師
追封魏國公改謚忠節

樂直膺魯華

樂直膺魯華蒙古克烈氏初以其部人二百從太祖
征乃蠻西夏有功命將萬人爲太師國王木華黎前
鋒下金桓州得其監馬幾百萬匹分屬諸軍軍勢大
振歲辛未破遼東西諸州唯東京未下獲金使遣往
諭之樂直膺魯華曰東京金舊都備嚴而守固攻之

未易下以計破之可也請易服與其使偕往說之彼
將不疑俟其門開繼以大軍赴之則可克矣卒如其
計徇地河北攻大名小大數十戰城垂陷中流矢而
卒武宗時贈太傅追封衛國公謚武敏子撒吉思卜
華嗣將其軍太宗元年己丑錫金符安輯河北山東
諸州先是真定同知武仙攻滅都元帥史天倪家其
弟天澤擊仙走復真定以天澤爲真定河間濟南東
平大名五路萬戶庚寅命撒吉思卜華佩金虎符以
總師行省監其軍金宣宗之徙都于汴也立河平軍
於新衛以自固恃爲北門撒吉思卜華數攻之不拔

壬申正月太宗自白波濟河而南睿宗由峭石灘涉漢而北撒吉思卜華集西都水之舟渡自河陰至鄭鄭守馬伯堅降及金義宗勢力窮蹙出奔帝命撒吉思卜華追躡之會其節度斜捨阿卜棄衛入汴撒吉思卜華遂擾而有之十二月義宗自黃陵岡濟河謀復衛撒吉思卜華與其將白撒戰白公廟五日夜俘斬萬計餘衆盡潰義宗竄歸德撒吉思卜華追躡其後薄北門而軍左右皆水其舟師日至癸巳四月其將官奴夜來斫營腹背受敵撒吉思卜華與一軍皆沒嗣國王塔思承制以其弟明安答兒領其行營尋有

旨以為蒙古漢軍萬戶明安答兒善騎射從征淮安因糧於敵未嘗匱乏軍士免負擔之勞咸樂為用癸丑憲宗遣從昔烈門太子南伐死于鈞州五子長膺虎幼普闌溪脂虎從世祖北征叛王挺戈出入其陣帝壯之賜號拔都賞白金四百五十兩及平李壇之亂亦有戰功普闌溪光祿大夫徽政使金亡命大臣忽都虎料民分封功臣撒吉思卜華妻楊氏自陳曰吾舅及夫皆死國事而獨爾見遺事聞帝曰彼家再世死難宜賜新衛民二百戶撒吉思卜華贈太師謚忠武明安答兒贈太保謚武毅爵皆衛國公

昔兒吉思

昔兒吉思幼從太祖征回回河西諸國俱有戰功太宗時從睿宗西征師次京北府會亦來哈解率諸部兵作亂昔兒吉思挺身斫賊陣下馬搏戰賊衆莫不披靡俄失所乘馬步走至睿宗軍中賊退睿宗嘉其勤勞妻以侍女唆火台世祖尤愛之軍旅田獵未嘗不在左右初昔兒吉思之妻爲皇子乳母於是皇太后待以家人之禮得同飲白馬湏時朝廷舊典白馬湏非宗戚貴胄不得飲也昔兒吉思子塔出爲寶兒赤迭只斡耳朶千戶塔出子千家奴徹里蠻千家奴從征乃顏力戰而死帝命籍乃顏人口財物以賜之撤里蠻年十六從世祖討阿里不哥戰於失門禿有功賜號拔都兒賞賚尤厚授光祿少卿仍襲爲迭只斡耳朶千戶改同僉宣徽院進僉院事以管軍千戶從征乃顏有功賞金盞二金五十兩復入爲同知宣徽院事成宗時拜宣徽使加太司徒卒子帖木迭兒襲爲迭只斡耳朶千戶累遷宣徽院使遙授左丞相

哈散納

哈散納怯烈亦氏太祖時從征王罕有功命同飲班朱尼河之水且曰與我共飲此水者世爲我用後管

領阿兒渾軍從太祖征西域下薛迷則于不花刺等
 城至太宗時仍命領阿兒渾軍併回回人匠三千戶
 駐于尋麻林尋授平陽太原兩路達魯花赤兼管諸
 色人匠後以疾卒子捏古伯襲從憲宗攻釣魚山有
 功以疾卒子撒的迷失襲撒的迷失卒子木八刺襲
 充貴赤千戶遷西域親軍副都指揮使大德元年卒
 弟禿滿答襲禿滿答卒子哈刺章襲

傳卷第九

列傳卷第十

元史一百二十三

翰林學士雷大嘉制誥兼修國史吳景濂翰林待制查郎昂制誥兼國史院編官種壽奉
 勅

布智兒

布智兒蒙古脫脫里台氏父紐兒傑身長八尺有勇
 力善騎射能造弓矢嘗道逢太祖前驅騎士別那顏
 邀與俱見太祖視其所挾弓矢甚佳問誰為造者對
 曰臣自為之適有野鳧翔于前射之獲其二并以二
 矢獻而退別那顏隨之至所居布智兒出見別那顏
 竒之許以女妻之父子遂俱事太祖嘗從征討賜紐

兒傑拔都名從征回回斡羅思等國每臨陣布智兒奮身力戰身中數矢太祖親視之令人拔其矢血流蒲體悶仆幾絕太祖命取一牛剖其腹納布智兒于牛腹浸熱血中移時遂甦紐兒傑卒憲宗以布智兒為大都行天下諸路也可扎魯忽赤印造寶鈔賜七寶金帶燕衣十襲又賜蔚州定安為食邑布智兒卒有子四人長好禮事世祖備宿衛會丞相伯顏伐宋奏好禮督水軍攻襄樊從渡江入臨安以功授昭毅大將軍水軍翼萬戶府達魯花赤別帖木兒吏部尚書補兒答思雲南宣慰使不蘭奚襲父職為水軍翼

萬戶招討使鎮守江陰移通州子完者不花遼陽省理問

召烈台抄兀兒

召烈台抄兀兒初事太祖時有哈刺赤散只兒朶魯班塔塔兒弘吉刺亦乞列思等居堅河之濱忽蘭也兒吉之地謀奉扎木合為帝將不利於太祖抄兀兒知其謀馳以告太祖遂以兵收海刺兒阿帶亦兒渾之地盡誅扎木合等惟弘吉刺入降太祖賜以答刺罕之名其子那真事世祖為也可扎魯花赤那真歿子伴撒襲其職伴撒卒子火魯忽台襲致和元年八

月執倒刺沙起軍之使察罕不花并其金字圓牌以獻天曆元年十一月帝賜金帶仍復其職嘗奏言有犯法者治之當自貴人始窮乏不給者救之當自下始如此則可得衆心矣其言良切於事弊云

闊闊不花

闊闊不花者按攤脫脫里氏爲人魁岸有膂力以善射知名歲庚寅太祖命太師木華黎伐金分探馬赤爲五部各置將一人闊闊不花爲五部前鋒都元帥所向莫能支然不嗜殺惟欲以威信懷附故所至無殘破略定濱棣諸州俘獲焦林諸處民四百餘但籍

其姓名遣歸鄉里徇益都守將降得其財物馬畜悉以分賜士卒歲壬辰從太宗渡河攻汴梁歸德分兵渡淮攻壽州守將無降意射書城中諭之城中人感泣以綵輿奉金公主開門送款闊闊不花下令軍中輒入城虜掠者死城中帖然公主義宗之姑也歲丙申太宗命五部將分鎮中原闊闊不花鎮益都濟南按察兒鎮平陽太原孛羅鎮真定肖乃台鎮大名怯烈台鎮東平括其民匠得七十二萬戶以三千戶賜五部將闊闊不花得分戶六百立官治其賦得薦置長吏歲從官給其所得五戶絲以疾卒官子黃頭代

領探馬赤爲元帥從丞相伯顏取宋道死子東哥馬襲其職累遷右都威衛千戶卒

拜延八都魯

拜延八都魯蒙古扎刺台氏幼事太祖賜名八都魯歲乙未太宗命領扎刺軍一千六百人與塔海甘卜同征關西有功癸丑憲宗命與阿脫總帥汪世顯創立利州城甲寅領兵紫金山破宋軍鹿角寨奪其軍餉器械丁巳從都元帥紐鄰城成都及領兵圍雲頂山下其城帝親征元帥紐鄰旣進兵涉馬湖江留拜延八都魯鎮成都降屬縣諸城得其民悉撫安之賜

黃金五十兩衣九襲諸王哈丹朶歡脫等征大理還命拜延八都魯領兵迎之道過新津寨與宋潘都統遇戰敗之殺獲甚衆中統二年元帥紐鄰上其功授蒙古奧魯官子外貌台孫兀渾察至元六年拜延八都魯告老兀渾察代其軍從行省也速答兒征諸國有功十六年從大軍征幹端又有功賞銀五十兩二十一年諸王朮伯命兀渾察往乞失哈里之地爲遊擊軍時敵軍二千餘兀渾察以勇士五十人與戰擒其將也班胡火者以獻王壯之以其功聞賞銀六百兩鈔四千五百貫授蒙古軍萬戶賜三珠虎符三

十年以疾卒次子襲授曲先塔林左副元帥尋卒弟塔海忽都襲陞鎮國上將軍都元帥改授四川蒙古副都萬戶至治二年以疾退子孛羅帖木兒襲

阿朮魯

阿朮魯蒙古氏太祖時命同飲班朱尼河之水扈駕親征有功命領兵收附遼東女直還賞金甲珠衣寶帶他物稱是復命總兵征西夏與敵兵大戰于合刺合察兒之地西夏勢蹙其主懼乞降執之以獻太宗殺之賜以所籍貲產繼領兵收附信安下金二十餘城其後告老諸王塔察兒命其子不花代領其軍

紹古兒

紹古兒麥里吉台氏事太祖命同飲班朱尼河之水扈從親征已而從破信安略地河西賜金虎符授洛磁等路都達魯花赤領軍出征復從伐金破河南太宗命領濟南大名信安等處軍馬復從國王答石出征歲辛亥卒子拜都襲拜都卒子忽都虎襲移睢州從世祖渡江攻鄂還鎮恩州中統三年從征李璫有功尋命修立邳州城領兵鎮兩淮十一年從丞相伯顏渡江有戰功又從叅政董文炳沿海出征還鎮嘉興行安撫事十二年加昭勇大將軍職如故十四年

元史列傳卷之五
授嘉興路總管府達魯花赤尋陞鎮國上將軍黃州
路宣慰使尋罷黃州宣慰司復舊任十六年改授浙
西道宣慰使加招討使仍鎮國上將軍奉詔征占城
以其國降表貢物入見帝嘉之厚加賞賚二十四年
從征交趾明年還師授邳州萬戶府萬戶三十年沒
于軍

阿刺瓦而思

阿刺瓦而思回鶻八瓦耳氏仕其國爲千夫長太祖
征西域駐蹕八瓦耳之地阿刺瓦而思率其部曲來
降從帝親征旣破瀚海軍又攻輪臺高昌于闐尋斯

于等靡戰不克沒于軍子阿刺瓦丁從世祖北征有
功至元二十九年卒壽一百二歲子瞻思丁有子五
人長烏馬兒陳州達魯花赤次不別隆鎮衛都指揮
使次忻都監察御史次阿合馬拱衛直司都指揮使
次阿散不別驍勇善騎射歷事成宗武宗仁宗數被
寵遇計前後所賜楮幣餘四十萬緡他物稱是積官
榮祿大夫三珠虎符子幹都蠻襲職致和元年八月
自上都逃來丞相燕帖木兒任爲裨將率壯士百人
圍滅里帖木兒等于陀羅臺驛擒之以獻特賜衣一
襲及秃秃馬失甲金束帶各一白金一百兩鈔二百

元史列傳卷之六
六
錠天曆元年九月充行院同僉十月從擊忽刺台馬
扎罕等軍于盧溝橋敗之追至紫荆関多所俘獲招
降安童所將軍一千五百人復以功受上賞二年進
樞僉院三年以隆鎮衛都指揮使兼領拱衛司

抄兒

抄兒別速氏世居汴梁陽武縣從太祖收附諸國有
功又從征金没于陣子抄海從征河南山東復没于
陳子別帖將其父軍從攻鄂州以功賞銀帛衣甲等
繼從太子忽哥赤西征大理國復没于陳子阿必察
至元五年授武畧將軍蒙古千戶賜金符從圍襄樊
復渡江奪陽羅堡岸口以功賞白金進宣武將軍蒙
古軍總管管領左右手兩萬戶軍既下廣德從平章
阿里海牙征海外國率死士鼓戰船進奪岸口擒勇
士趙安等以功賞銀帛十六年命管領蒙古侍衛軍
以疾卒于軍

也蒲甘卜

也蒲甘卜唐兀氏歲辛巳率衆歸太祖隸蒙古軍籍
奉旨同所管河西人從木華黎出征以疾卒子昂吉
兒襲領其軍征諸國有功至元六年授金符千戶從
征蘄黃安慶等處九年易虎符陞信陽萬戶從平章

阿朮南征又有功歷淮西道宣慰使叅知政事都元帥廬州蒙古漢軍萬戶府達魯花赤行省左丞相尚書左丞積官龍虎衛上將軍二十一年携其子昂阿秃入見世祖命昂阿秃充速古兒赤二十四年隨駕征乃顏有功奉旨代其父職二十六年授廬州蒙古漢軍萬戶府達魯花赤大德六年領兵討宋隆濟等以功受上賞還鎮廬州以私財築室一百二十餘間以居軍士之貧者省臺以其事聞特命陞其秩以金束帶賜之泰定四年卒昂阿秃之弟暗普由速古兒赤授金符唐兀秃魯花千戶後改授海北海南道廉

訪使

趙阿哥潘

趙阿哥潘土波思烏思威掇族氏始附宋賜姓趙氏世居臨洮祖巴命富甲諸羌父阿哥昌貌甚偉有力兼人金貞祐中以軍功至熙河節度使金亡保蓮花山以其衆來歸皇子闊端之鎮西土也承制以阿哥昌爲疊州安撫使時兵興城無居人至則招逃亡立城壘課耕桑以安輯之年八十卒于官阿哥潘事親以孝聞從伐蜀與宋都統制曹友聞屢戰勝負畧相當以破大安功最授同知臨洮府事斬朝天關乘嘉

陵江至閬州獲蜀船三百艘攻利州生得其劉太尉
戰敗宋師于潼川宋制置使劉雄飛進攻青居山阿
哥潘擊之宵潰四川大震進逼成都畧嘉定平峨眉
太平寨擒其將陳侍郎田太尉餘衆悉降大小五十
餘戰皆先陷陣皇子賜以金甲銀器歲壬子世祖以
皇弟南征大理道出臨洮見而奇之命攝元帥城益
昌時宋兵屯兩川堡柵相望矢石交擊歷五年而城
始完憲宗出蜀以阿哥潘爲選鋒攻西安下之賜金
符授臨洮府元帥帝駐釣魚山合州守將王堅夜來
所營阿哥潘率壯士逆戰手殺數十百人堅遂引去

明日陞見帝喜曰有臣如此朕復何憂賜黃金五十
兩名曰拔都中統建元詔還鎮臨洮歲饑發私廩以
賑貧乏給民農種粟二千餘石蕪菁子百石人賴不
饑郡當孔道傳置旁午有司敝于供給阿哥潘以私
馬百疋充驛騎羊千口代民輸帝聞而嘉之詔京兆
行省酬其直阿哥潘曰我豈以私惠而邀公賞耶卒
不受以軍事赴青居山道爲宋兵所邀遂死于敵阿
哥潘好畜良馬常千蹄歲擇其上驥五駟貢于朝子
孫遵之不替先是勲臣子孫爲祖父請謚者帝每靳
之至是勅大臣以美謚謚之謚曰桓勇子重喜始給

待皇子闊端爲親衛癸丑從世祖征哈刺章數有功
中統元年渾都海反從總帥汪良臣引兵至拔沙河
納火石地逆戰以功授征行元帥四年從討忽都達
吉散竹台等克之制必帖木兒王承制使襲父職爲
元帥入覲賜金虎符爲臨洮府達魯花赤時解軍職
而轉民官者例納所佩符有旨趙氏世世勤勞其金
符勿拘常例使終佩之重喜在郡劭農興學省刑敦
教以善治聞請致事不許詔其長子官卓斯結襲爲
達魯花赤陞重喜鞏昌二十四處宣慰使卒謚桓襄
官卓斯結性靖退辭官閑處二十餘年仁宗聞其名
召不起子德壽雲南左丞

純只海

純只海散木台氏弱冠宿衛太祖帳下從征西域諸
國有功歲癸巳太宗命佩金虎符充益都行省軍民
達魯花赤從大帥太出破徐州擒金帥國用安丁酉
以益都爲皇太子分土遷京兆行省都達魯花赤至
懷值大疫士卒困憊有旨以本部兵就鎮懷孟未幾
代察罕總軍河南尋復懷孟己亥同僚王榮潛畜異
志欲殺純只海伏甲繫之斷其兩足跟以帛緘純只
海口置佛祠中純只海妻喜禮伯倫聞之率其衆攻

榮家奪出之純只海裹瘡從二子馳旁郡請兵討榮
 殺之朝廷遣使以榮妻孥貲產賜純只海家且盡驅
 懷民萬餘口郭外將戮之純只海力爭曰為惡者止
 榮一人耳其民何罪若果盡誅徒守空城何為苟朝
 廷罪使者以不殺吾請以身當之使者還奏帝是其
 言民賴不死純只海給榮妻孥券放為民遂以其宅
 為官廨秋毫無所取郡人德之既入覲太宗以純只
 海先朝舊臣功績昭著賜第一區於和林尋以疾卒
 勅葬山陵之側皇慶初贈推忠宣力功臣金紫光祿
 大夫上柱國溫國公謚忠襄仍勅詞臣劉敬中製文

樹碑於懷以旌其功云子昂阿剌嗣

苦徹拔都兒

苦徹拔都兒欽察人初事太宗堂牧馬從攻鳳翔戰
 潼關皆有功後從大將速不台攻汴京金人列木柵
 於河南苦徹拔都兒率死士往拔之賜良馬十匹師
 還金將高都尉率眾邀於中路苦徹拔都兒迎擊斬
 其首以歸賜白金五十兩幣四匹從攻蔡州前鋒荅
 荅兒與金將戰金將捽其鬚苦徹拔都兒進斫金將
 乃得脫蔡州破金守將佩虎符立城上苦徹拔都兒
 以鐵椎擊殺之取虎符以獻帝嘉其能命從皇子攻

襄陽繼從宗王口温不花攻光州一日五戰光州下
賜黃金五十兩白金酒器一事馬三十匹百戶愛不
怯赤自以臨陣不勇乞苦徹拔都兒自代遂陞百戶
從攻滁州與宋兵大戰至暮宋兵敗走西山苦徹拔
都兒與千戶忽孫追殺之歲己未世祖伐宋募能先
絕江者苦徹拔都兒首應命率衆逼南岸詔苦徹拔
都兒與脫歡領兵百人同宋使諭鄂州使降抵城下
鄂守將殺使者以軍來襲苦徹拔都兒與之遇奮擊
大破之復賜黃金五十兩中統三年授蔡州蒙古漢
軍萬戶冬宋人犯西平苦徹拔都兒逐北踰淮獲其

生口甚衆至元二年秋由安慶入廬州聞宋兵至亟
設伏于竹林擊殺之四年秋九月元帥阿木軍襄陽
安陽灘宋兵據渡口苦徹拔都兒擊破其衆五年從
阿木圍襄陽擊奪宋將夏貴米舟阿木入漢江以其
有戰功俾與扎刺兒引軍南畧獲八十人十年八月
畧地淮東十一年遣招鄂州十二年遣招滁州誅王
安撫改武畧將軍管軍千戶五月伏兵大江北岸擊
宋軍敗走之十三年復畧地淮東獲其總管二人以
獻遷滁州總管府達魯花赤宋都統姜才率軍取糧
高郵苦徹拔都兒從史萬戶奪其馬及糧橐二萬淮

東平入朝十四年從討叛人只里瓦丁于懷刺合都
改宣武將軍滁州路總管府達魯花赤十七年率其
子脫歡孫麻兀入見奏曰臣老矣幸主上憐之帝命
以脫歡爲宣武將軍管軍總管佩金符麻兀爲滁州
路總管府達魯花赤其後脫歡以征倭功授明威將
軍滁州萬戶府達魯花赤陞昭勇大將軍征行軍萬
戶府達魯花赤佩三珠虎符又以征爪哇功陞昭毅
大將軍鎮守無爲滁州萬戶府達魯花赤次子鎖住
襲其職

怯怯里

怯怯里斡耳那氏太宗七年南伐以千戶從闊端攻
安豐壽州又從諸王塔察兒率蒙古軍二千攻荆山
破之賜馬二匹與萬戶納斛以兵守沂郟畧漣海又
從元帥懷都攻襄陽卒子相兀速襲父職率本部兵
從丞相阿木攻襄樊又從塔出築正陽堡瀘軍乘艦
來窺壁壘相兀速率征騎逆之夾淮水而軍射死者
甚衆至元十一年賜金符授武畧將軍明年從御史
大夫博羅罕平漣海秋九月從丞相伯顏渡淮率兵
一千騎攻淮安南門破之又從元帥博羅罕築灣頭
堡萬戶納兒斛卧疾令相兀速權領蒙古女直漢人

三萬戶夏五月宋揚州都統姜才引兵來侵相兀速率本部兵逆戰有功又從丞相阿朮襲制置使李庭芝及姜才于泰州皆殺之十四年加宣武將軍管軍總管十八年爲蒙古侍衛親軍總管二十三年改千戶三十年陞蒙古侍衛親軍副指揮使司事易金虎符加顯武將軍子捏古解元貞元年爲蒙古侍衛親軍百戶大德六年襲父職佩金虎符授宣武將軍延祐四年陞左翊蒙古侍衛親軍都指揮使仍所佩符進懷遠大將軍

塔不已兒

塔不已兒東呂紉氏太宗時以招討使將兵出征破信安河南以功授金虎符征行萬戶歲甲寅以疾卒子脫察刺襲職歲己未率兵渡江破十字寨命其子重喜從行重喜率先引弓射中敵兵又多殺獲旣而與敵兵戰于洋隘口奪戰艦一流矢中左足勇氣愈倍時世祖駐蹕洋隘口北親勞之曰汝年幼能宣力如是深可嘉尚然繼今尤當勉之及脫察刺卒以重喜襲職中統三年從征李壇有功四年以兵鎮莒州至元二年奉旨初築十字路城以備守禦重喜率兵南巡爲游擊軍四年從抄不花出征至泗州北古城

時蔡千戶爲敵兵所圍重喜奮戰救而出之五年入
覲帝嘉其功賜白金納失失段及金鞍弓矢等十年
修正陽城明年宋兵圍正陽從戰敗之十二年從下
連海諸城俄奉旨率五千人從出征道過衡陽店與
宋將李提轄等戰大敗之殺掠幾盡遂駐兵瓜洲十
三年夏六月宋都統姜才領諸軍來圍城堡敗之秋
七月從兵襲擊李庭芝等于泰州十四年進昭勇大
將軍婺州路總管府達魯花赤佩已降虎符未幾卒
子慶孫襲職初授宣武將軍管軍總管鎮守安樂州
十六年移戍鎮江府十八年還鎮通州二十年進明
威將軍二十二年移鎮十字路二十四年領諸翼軍
鎮太湖教習水戰二十九年從征爪哇陞昭勇大將
軍征行上萬戶將行有旨留之皇慶二年卒子孛蘭
奚襲

直脫兒

直脫兒蒙古氏父阿察兒事太祖爲博兒赤直脫兒
從太宗征欽察康里回回等部有功四年收河南關
西諸路得民戶四萬餘以屬莊聖皇太后爲脂粉絲
線顏色戶八年建織染七局于涿州明年改涿州路
以直脫兒爲達魯花赤卒子哈蘭木襲佩虎符李壇

元史列傳卷一
三
叛世祖命領諸萬戶爲監戰達魯花赤以討之有功授解萬戶翼監戰領軍遷益都路蒙古萬戶監戰密州沒于軍從子忽刺出襲職授昭勇大將軍至元十一年攻宋六安軍有功行中書省命領諸軍戰艦衝宋軍宋軍敗有旨褒賞九月師次安慶忽刺出及叅政董文炳領山東諸軍順流東下至丁家洲遇宋臣夏貴孫虎臣等戰江中宋軍大敗擒其將校三十七人軍五千餘船四十艘十二年三月與宋軍戰朱金沙復有功七月復與宋軍戰焦山江中時丞相阿朮等督戰忽刺出與董文炳身冒矢石汧流塵戰八十

餘里忽刺出身被數傷累劓力戰遂勝之九月宋臣張殿帥攻奪呂城倉丹陽縣忽刺出與萬戶懷都往救生擒之十月下常州從丞相伯顏畧蘇湖秀州至長橋遇宋軍又敗之十三年正月師至杭州丞相伯顏命忽刺出守浙江亭及宋北門五月揚州軍劫揚子橋僅敗之六月敗真州軍七月追李庭芝至通海口降揚州及高郵寶應真州滁州等城江南平加昭毅大將軍職如故尋遷湖州路達魯花赤十四年進鎮國上將軍淮東宣慰使已而屯守上都十五年授嘉議大夫行御史臺中丞十九年進資善大夫福建

行省左丞黃華叛平之二十年授江淮行省左丞二十三年遷右丞三月進榮祿大夫江浙行省平章政事六月卒

月里麻思

月里麻思乃馬氏歲丁丑太宗命與斷事官忽都那同署歲戊戌又同阿朮魯拔都兒充達魯花赤破南宿州歲辛丑使宋議和從行者七十餘人月里麻思語之曰吾與汝等奉命南下楚人多詐倘遇害當死焉毋辱君命已而馳抵淮上宋將以兵脅之曰爾命在我生死頃刻間耳若能降官爵可立致不然必不汝貸月里麻思曰吾持節南來以通國好反誘我以不義有死而已言辭慷慨不少屈宋將知其不可逼乃囚之長沙飛虎寨三十六年而死世祖深悼之詔復其家以子忽都哈思為答刺罕日給糧食其家人忽都哈思自陳於帝曰臣願為國效死為父雪耻帝嘉納之授以上均州監戰萬戶十八年以招討使將兵征日本死於敵

捏古刺

捏古刺在憲宗朝與也里牙阿速三十人來歸後從征釣魚山討李璫皆有功子阿塔赤世祖時圍襄陽

元史卷十七
下江南敗失列及征乃顏皆以功受賞後事成宗武
宗爲札撒兀孫仁宗時歷官至左阿速衛千戶卒子
教化初爲速古兒赤繼襲父職必里阿秃叛奉旨往
平之凱還賜衣一襲天曆元年八月從丞相燕帖木
兒戰居庸北有功九月進拱衛直都指揮使尋遷章
佩卿子者燕不花初事仁宗爲速古兒赤英宗時爲
進酒寶兒赤天曆元年迎文宗于河南賜白銀絲段
命爲溫都赤九月往居庸關料敵道逢二軍謂探馬
赤諸軍曰今北兵且至其避之者燕不花恐搖衆心
即拔所佩刀斬之授兵部郎中招集阿速軍四百餘
人十月進兵部尚書授雙珠虎符領軍六百人迎敵
通州會丞相燕帖木兒至檀子山與秃蒲迭兒戰敗
之遷大司農丞

阿兒思蘭

阿兒思蘭阿速氏初憲宗以兵圍阿兒思蘭之城阿
兒思蘭偕其子阿散真迎謁軍門帝賜手詔命專領
阿速人且留其軍之半餘悉還之俾鎮其境內以阿
散真置左右道遇閣兒哥叛軍阿散真力戰死之帝
遣使裹屍還葬之阿兒思蘭言于帝曰臣長子死不
能爲國効力今以次子捏古來獻之陛下願用之捏

古來至帝命從兀良哈台征哈刺章有功兀良哈台
賞以白金名馬從伐宋中流矢而死子忽兒都答充
管軍百戶世祖命從不羅那顏使哈兒馬某之地以
疾卒子忽都帖木兒武宗潛邸時從征海都以功賞
白金至大元年授宣武將軍左衛阿速親軍副都指
揮使四年卒

哈八兒禿

哈八兒禿薛亦氏憲宗時從攻釣魚山有功還又從
親王塔察兒北征充千戶所都鎮撫從千戶脫倫伐
宋没于陣子察罕從塔察兒攻樊城西門領揚州等

處游擊軍與宋兵戰有功至元十一年從忽都帖木
兒攻江陵東南城堡又從阿刺罕敗宋兵于陽邏堡
之南阿刺罕選爲本萬戶府副鎮撫十二年分隸脫
脫總管出廣德游擊軍與宋兵戰敗之賜以白金酒
器又從攻獨松千秋撥出等關及諸山寨其降民悉
綏撫之賜白金一百兩十三年中書省檄爲瑞安縣
達魯花赤始至招集逃移民十萬餘戶十四年陞忠
顯校尉管軍總把併領新附軍五百人從宣慰唐兀
台戰于司空山有功命以其職兼都鎮撫俄選充侍
衛親軍十六年授銀符忠武校尉管軍總把二十四

年賜金符授承信校尉蒙古衛軍屯田千戶二十五年進武義將軍本所達魯花赤二十七年陞左翼屯田萬戶府副萬戶大德五年卒子太納襲

艾貌

艾貌拔都康里氏初從雪不台那演征欽察攻河西城收西關破河南繼從定宗畧地阿奴皆有功又從四太子南伐命充怯憐口阿荅赤孛可孫又從兵渡江攻鄂以疾卒于軍子也速台兒從討阿藍荅渾都海征李璫伐宋累功授管軍總把至元十四年從攻福建興化招古田等處民五千餘戶以功陞武畧將

軍千戶賜金符又招手號新軍二千五百餘人陞宣武將軍總管賜虎符有旨征日本也速台兒願効力賜以弓矢進懷遠大將軍萬戶二十年授泰州萬戶府達魯花赤二十三年遷昭勇大將軍欽察親軍都指揮使二十四年從征乃顏有功明年卒後贈金吾衛上將軍追封成武郡公謚顯敏

列傳卷第十

列傳卷第十

元史二百二十四

翰林學士知制誥兼修國史吳棟翰林待制承直郎同知制誥兼國史院編修官王禕等奉勅修

塔本

塔本伊吾廬人人以其好揚人善稱之曰揚公父宋五設託陀託陀者其國主所賜號猶華言國老也塔本初從太祖討諸部屢阨艱危復從圍燕征遼西下平凜白霄諸城軍士有妄殺人者塔本戒之曰國之本民也殺人得地何益於國且殺無罪以堅敵心非上意太祖聞而喜之賜金虎符俾鎮撫白霄諸郡號

行省都元帥管內得承制除縣吏死囚得專決父之
徙治興平興平兵火傷殘民慘無生意塔本召父老
問所苦為除之薄賦斂役有時民大悅乃相與告教
無違約束歸者四集塔本始至戶止七百不一二年
乃至萬戶出已馬以寬驛人貸廉吏銀其子錢不能
償者焚其券農不克耕亦與之牛比歲告稔民用以
饒庚寅詔益中山平定平原隸行省甲午盜李仙趙
小哥等作亂塔本止誅首惡宥其誑誤癸卯立春日
宴羣僚歸而疾作遂卒是夕星隕隱隱有聲遣命葬
以紙衣瓦棺贈推誠定遠佐運功臣太師開府儀同

三司上柱國追封營國公謚忠武子阿里乞失鐵木
兒

阿里乞失帖木兒嗣父職為興平等處行省都元帥
其為治一遵先政興學養士輕刑薄徭雖同僚不敢
私役一民從大軍伐高麗有功歲丙辰卒贈宣忠輔
義功臣榮祿大夫平章政事柱國追封營國公謚武
襄子阿台

阿台當襲父職適罷行省為平灤路總管府丁巳憲
宗命阿台為平灤路達魯花赤始至請蠲銀鹽酒等
稅課八之一細民不征世祖即位來朝賜金虎符諸

侯王道出平灤供給費銀七千五百兩戶部不即償
阿台自陳上前盡取償以歸置甲乙籍籍民丁力民
甚便之至元十年進階懷遠大將軍歲饑發粟賑民
或持不可阿台曰朝廷不允願以家粟償官於是全
活甚衆僚屬始至阿台必遺之鹽米羊畜什器曰非
有他也欲其不剥民耳姻族窮者月有常給民有喪
不能葬者與之棺槨布帛資糧灤爲孤竹故國乃廟
祀伯夷叔齊以勵風俗二十一年進昭武大將軍二
十四年乃顏叛獻馬五百疋佐軍世祖大喜已而得
乃顏銀甕亟以賜之二十五年入朝以疾卒賜宣力

功臣資德大夫中書右丞上護軍追封永平郡公謚
忠亮子迭里威失

迭里威失少好讀書成宗時入宿衛授河西廉訪司
僉事拜監察御史遷淮西廉訪副使召爲中書左司
員外郎改樞密院參議陞判官延祐四年授翰林侍
講學士出爲河間路總管屬歲饑出俸金及官庫所
積賑之活數十萬人河間當水陸要衝四方供億皆
取給焉迭里威失立法調遣民使之復建言增置便
習弓馬尉一人益邏兵之數於是盜賊屏息陵州羣
凶爲官民害悉收繫死獄中後陞遼陽行省叅知政

事子鎖咬兒哈的迷失

鎖咬兒哈的迷失年十二宿衛英宗潛邸掌服御諸物英宗即位拜監察御史至治元年春詔起大刹于京西壽安山鎖咬兒哈的迷失與御史觀音保成珪李謙亨上章極諫以爲東作方始而興大役以耗財病民非所以祈福也且歲在辛酉不宜興築初司徒劉夔妄獻浙右民田冒出內帑鈔六百萬貫丞相帖木迭兒分取其半監察御史發其姦由是疾忌臺諫至是帖木迭兒之子瑣南爲治書侍御史密奏曰彼宿衛舊臣聞事有不便弗即入白今訕上以揚已之直大不敬帝乃殺鎖咬兒哈的迷失與觀音保成珪謙亨黥之竄諸遐裔恭定初贈鎖咬兒哈的迷失資德大夫御史中丞上護軍追封永平郡公謚貞愍賜其妻子鈔五百貫良田千畝仍詔樹碑神道

哈刺亦哈赤北魯

哈刺亦哈赤北魯畏兀人也性聰敏習事國王月仙帖木兒亦都護聞其名自唆里迷國徵爲斷事官月仙帖木兒卒子八兒出阿兒忒亦都護年幼西遼主鞠兒可汗遣使據其國且召哈刺亦哈赤北魯至則以爲諸子師八兒出阿兒忒聞太祖明聖乃殺西遼

使更遣阿憐帖木兒都督等四人使西遼阿憐帖木兒都督者哈刺亦哈赤北魯婿也具語以其故於是與其子月朶失野訥馳歸太祖一見大悅即令諸皇子受學焉仍令月朶失野訥以質子入宿衛從帝西征至別失八里東獨山見城空無人帝問此何城也對曰獨山城往歲大饑民皆流移之它所然此地當北來要衝宜耕種以爲備臣昔在唆里迷國時有戶六十願移居此帝曰善遣月朶失野訥佩金符往取之父子皆留居焉後六年太祖西征還見田野墾闢民物繁庶大悅問哈刺亦哈赤北魯則已死矣廼賜

月朶失野訥都督印章兼獨山城達魯花赤月朶失野訥卒子乞赤宋忽兒在太宗時襲爵賜號答刺罕子四人曰塔塔兒曰忽棧曰火兒思蠻曰月兒思蠻世祖命火兒思蠻從雪雪的斤鎮雲南月兒思蠻事憲宗襲父爵兼領僧人後因軍帥札忽兒台據別失八里盡室徙居平涼與其子阿的迷失帖木兒入覲世祖詔入宿衛爲必闈赤命從安西王忙哥剌出鎮六盤安西王薨其子阿難荅嗣成宗即位遣使入朝因奏阿的迷失帖木兒父子本先帝舊臣來事先王服勤二十餘年矣若終老王府非所以盡其才也願

元史列傳卷十一
五
以歸陛下用之成宗可其奏授阿的迷失帖木兒汝
州達魯花赤積官秘書太監卒子阿隣帖木兒

阿隣帖木兒善國書多聞識歷事累朝繇翰林待制
累遷榮祿大夫翰林學士承旨英宗時以舊學日侍
左右陳說祖宗以來及古先哲王嘉言善行翻譯諸
經紀錄故實總治諸王駙馬蕃國朝會之事天曆初
北迎明宗入正大統一見歡甚顧左右曰此朕師也
天曆三年進光祿大夫知經筵事子曰沙刺班曰禿
忽魯曰六十曰咱納祿沙刺班累拜中書平章政事
大司徒宣政院使

塔塔統阿

塔塔統阿畏兀人也性聰慧善言論深通本國文字
乃蠻大斡可汗尊之爲傳掌其金印及錢穀太祖西
征乃蠻國亡塔塔統阿懷印逃去俄就擒帝詰之曰
太斡人民疆土悉歸於我矣汝負印何之對曰臣職
也將以死守欲求故主授之耳安敢有他帝曰忠孝
人也問是印何用對曰出納錢穀委任人材一切事
皆用之以爲信驗耳帝善之命居左右是後凡有制
旨始用印章仍命掌之帝曰汝深知本國文字乎塔
塔統阿悉以所蘊對稱旨遂命教太子諸王以畏兀

字書國言太宗即位命司內府王璽金帛命其妻吾和利氏爲皇子哈刺察兒乳母時加賜予塔塔統阿召諸子諭之曰上以汝母鞠育太子賜予甚厚汝等豈宜有之當先供太子用有餘則可分受帝聞之顧侍臣曰塔塔統阿以朕所賜先供太子其廉介可知矣由是數加禮遇以疾卒至大三年贈中奉大夫追封鴈門郡公子四人長玉笏迷失次力渾迷失次速羅海次薦綿玉笏迷失少有勇畧渾都海叛於三盤時玉笏迷失守護皇孫脫脫營壘率其衆與渾都海戰敗之追至只必勒適遇阿藍答兒與之合兵復戰玉笏迷失死之力渾迷失有膂力嘗獵于野與衆相失遇盜三人欲奪其衣力渾迷失搏之盡仆遂縛以還帝召見選力士與之角無與敵者帝壯之賜金令脩宿衛速羅海襲父職仍命司內府王璽金帛薦綿舊事皇子哈刺察兒世祖即位從其母入見欲官之以無功辭命統宿衛奉使遼東卒封鴈門郡公子阿必實哈陝西行省平章政事

岳璘帖穆尔

岳璘帖穆尔回鶻人畏兀國相噉欽谷之裔也其兄叱理伽普華年十六襲國相答刺罕時西契丹方強

威制畏兀命太師僧少監來臨其國驕恣用權奢淫
自奉畏兀王患之謀於叱理伽普華曰計將安出對
曰能殺少監挈吾衆歸大蒙古國彼且震駭矣遂率
衆圍少監斬之以功加號叱理傑忽底進授明別吉
妻號赫思迭林左右有疾其功者譖于其王曰少監
珥珠先王寶也叱理伽普華匿之盍急索勿失其王
怒索寶甚急叱理伽普華度無以自明乃亡附太祖
賜以金虎符獅紐銀印金螭椅一衣金直孫校尉四
人仍食二十三郡繼又賜銀五萬兩以弟岳璘帖穆
爾爲質叱理伽普華以疾卒岳璘帖穆爾從太祖征
討多戰功皇弟幹真求師傅帝命岳璘帖穆爾往訓
導諸王子以孝弟敦睦仁厚不殺爲先帝聞而嘉之
從平河南徙鄧縣民萬餘戶入樂安俄授河南等處
軍民都達魯花赤佩金虎符并賜宮女四人所得上
方賞賚悉輦歸故郡以散親舊且盛陳漢官儀衛以
激厲之國人羨慕道出河西所過榛莽或時乏水爲
之鑿井置埃居民使客相慶稱便太祖即位以中原
多盜選充大斷事官從幹真出鎮順天等路布德化
寬征徭盜遁姦革州郡清寧尋復監河南等處軍民
年六十七卒于保定後贈宣力保德功臣山東宣慰

使謚莊簡子合刺普華見忠義傳

李楨

李楨字幹臣其先西夏國族子也金末楨以經童中選既長入爲質子以文學得近侍太宗嘉之賜名玉出干必閣赤從皇子闊出伐金帝命之曰九軍中事須訪楨以行及下河南諸郡闊出遣楨偕吉登哥往唐鄧二州數民實兵餘歲凶流散十八九楨至賑恤饑寒歸者如市十年從大將察罕下淮甸楨以功佩金符授軍前行中書省左右司郎中楨奏尋訪天下儒士令所在優贍之十三年師圍壽春天雨不止楨言於察罕曰頓師城下暑南疫你將有不利且城又拒命破必屠之則生靈何辜請退舍數里身往招之從之楨遂單騎入敵壘曉以利害明日與其將二人率衆來降以功賜銀五千兩楨表言襄陽乃吳蜀之要衝宋之喉襟得之則可爲他日取宋之基本定宗嘉其言庚戌賜虎符授襄陽軍馬萬戶丙辰憲宗命楨率師巡哨襄樊戊午帝親征召楨同議事秋九月卒于合州年五十九

速哥

速哥蒙古怯烈氏世傳李唐外族父懷都事太祖嘗

從飲班朮居河水速哥爲人外若質直而內實沉勇
有謀雅爲太宗所知命使金因俾覘其虛實語之曰
即不還子孫無憂不富貴也速哥頓首曰臣死職耳
奉陛下威命以行可無慮也帝悅賜所常御馬至河
金人閉之舟中七日始登南岸又三旬乃達汴及見
金主曰天子念爾土地日狹民力日疲故遣我致命
爾能共修歲幣通好不絕則轉禍爲福矣謁者令下
拜速哥曰我大國使爲爾屈乎金主壯之取金卮飲
之酒曰歸語汝主必欲加兵敢率精銳以相周旋歲
幣非所聞也速哥飲畢即懷金卮以出速哥雖佯爲
不智而默識其地理阨塞城郭人民之強弱旣復命
備以虛實告且以所懷金卮獻帝喜曰我得金於汝
手中矣復以賜之始下令徵兵南伐兵至河北岸方
舟欲渡金軍陣於河南帝令儀衛導速哥居中行親
率偏師乘陣西策馬沙河會睿宗軍亦由襄鄧至兩
軍夾攻之及金亡詔賜金護駕士五人曰此以旌汝
爲使之不辱也昔使過崞州崞人盜殺其良馬至是
無以崞民賜之歲乙未帝從容謂速哥曰我將官汝
西域中原惟汝擇之速哥再拜曰幸甚臣意中原爲
便帝曰西山之境八達以北汝其主之汝於城中構

大樓居其上使人皆仰望汝汝俯而諭之願不偉乎
乃以爲山西大達魯花赤受命方出有回回六人訟
事不實將抵罪遇諸途急止監者曰姑緩其刑當入
奏復見帝曰此六人者名著西域徒以小罪盡誅之
恐非所以懷遠人也願以賜臣臣得困辱之使自悔
悟遷善爲他日用殺之無益也帝意解召六人謂之
曰生汝者速哥也其竭力事之至雲中皆釋之後有
至大官者其寬大愛人多類此卒年六十二贈推忠
翊運同德功臣太師開府儀同三司上柱國追封宣
寧王謚忠襄子六人曰長罕曰玉呂忽都曰撒合里
都曰忽蘭曰忽都兒不花曰不花長罕玉呂忽都撒
合里都皆從兀魯赤太子出征以戰功顯忽蘭之母
以后戚故得襲職鉏強植弱均役平刑闔郡賴以安
輯乙未之抄戶籍也前賜嶠人已入官籍更賜山西
戶三百西方多盜郡縣捕不得則法當計所失物直
倍償郡縣苦之有甄軍判者率群盜往來阜平曲陽
間殺人渾源界而奪之財縣以失捕當償忽蘭曰此
大盜也縣豈能制哉即遣千人捕甄殺之勦捕其餘
黨其害乃除忽蘭性純篤然酷好佛嘗施千金修龍
宮寺建金輪大會供僧萬人卒年四十二贈太保金

紫光祿大夫上柱國追封雲國公謚康忠子天德于
思穎悟過人世祖聞其賢令襲父爵養母完顏氏以
孝聞自中山北來適有邊釁天德于思督造兵甲撫
循其民無有寧息形容盡瘁帝聞而嘉之賜馴豹名
鷹使得縱獵禁地當時眷顧最號優渥卒年三十九
贈大傅儀同三司上柱國追封雲國公謚顯毅子孫
世多顯貴云

忙哥撒兒

忙哥撒兒察哈札刺兒氏曾祖赤老溫愷赤祖朮阿
父那海並事烈祖及太祖嗣位年尚幼所部多叛亡
朮阿獨不去皇弟朮只哈撒兒陰擿之去亦謝不從
朮阿精騎射帝甚愛之號爲默爾傑華言善射之尤
者也帝嘗與賊遇將戰有二飛鷲至帝命朮阿射之
請曰射其雄乎抑雌者乎帝曰雄者朮阿一發墜其
雄賊望見驚曰是善射若此飛鳥且不能逃况人乎
不戰而去從征乃蠻敵率銳兵鼓而進朮阿按兵屹
不動敵止俄復鼓而進朮阿亦不動敵卒疑畏不敢
前世祖征蔑里吉兵潰朮阿與其弟左右力戰以衛
帝會兀良罕哲里馬來援敵乃引退那海事太祖備
歷艱險未嘗形於言帝嘉其忠且念其世勲詔封懷

洛陽百七十五戶忙哥撒兒事睿宗恭謹過其父嘗從攻鳳翔首立奇功定宗陞爲斷事官剛明能舉職憲宗在藩邸深知其人從征幹羅思阿刺欽察諸部常身先諸將及以所俘寶玉頒諸將則退然一無所取憲宗由是益重之使治藩邸之分民間出游獵則長其軍士動如紀律雖太后及諸嬪御小有過失知無不言以故邸中人咸敬憚之廼以爲斷事官之長其位在三公之上猶漢之大將軍也既拜命出帳殿外欹橐坐熊席其僚列坐左右者四十人忙哥撒兒問曰主上以我長此官諸公其爲我言當以何道守

官衆皆默然又問之有夏人和幹居下坐進曰夫札魯忽赤之道猶宰之割羊也鮮肩者不使傷其脊在持平而已忙哥撒兒聞之即起入帳內衆不知所爲皆咎和幹失言既入乃爲帝言和幹之言善帝召和幹命之步曰是可用之才也和幹由是知名定宗崩宗王八都罕大會宗親議立憲宗畏兀八刺曰失烈門皇孫也宜立且先帝嘗言其可以君天下諸大臣皆莫敢言忙哥撒兒獨曰汝言誠是然先皇后立定宗時汝何不言耶八都罕固亦遵先帝遺言也有異議者吾請斬之衆乃不敢異八都罕乃奉憲宗立之

憲宗之幼也太宗甚重之一日行幸天大風入帳殿
命憲宗坐膝下撫其首曰是可以君天下他日用特
按豹皇孫失烈門尚幼曰以特按豹則犢將安所養
太宗以爲有仁心又曰是可以君天下其後太宗崩
六皇后攝政竟立定宗故至是二人各舉以爲言云
憲宗既立察哈台之子及按赤台等謀作亂剽車轅
歲兵其中以入轅折兵見克薛傑見之上變忙哥撒
兒即發兵迎之按赤台不虞事遽覺倉卒不能戰遂
悉就擒憲宗親簡其有罪者付之鞠治忙哥撒兒悉
誅之帝以其奉法不阿委任益專有當刑者輒以法
刑之乃入奏帝無不報可帝或卧未起忙哥撒兒入
奏事至帳前扣箭房帝問何言即可其奏以所御大
帳行扇賜之其見親寵如此癸丑冬病酒而卒帝以
忙哥撒兒當國時多所誅戮及是咸騰謗言迺爲詔
諭其子畧曰汝高祖赤老温愷赤暨汝祖搠阿事我
成吉思皇帝皆著勞績惟朕皇祖實褒嘉之汝父忙
哥撒兒自其幼時事我太宗朝夕忠勤罔有過咎從
我皇考經營四方迨事皇妣及朕兄弟亦罔有過咎
暨朕討定斡羅思阿速穩兒別里欽察之域濟大川
造方舟伐山通道攻城野戰功多於諸將俘厥寶玉

大賚諸將則退然無欲得之心惟朕言是用修我邦
憲治我蒐田輯我國家罔不咸乂惟厥忠雖其私親
與朕嬪御小有過咎一是無有比私故朕皇妣迨朕
昆弟無不嘉賴朝之老臣宿衛者舊無不嚴畏錄其
勤勞命爲札魯忽赤治朕皇考受民布昭大公以辨
獄慎民爰作朕股肱耳目衆無諱言朕聽以安自時
厥後察哈台阿哈之孫太宗之裔定宗闕出之子及
其民人越有他志賴天之靈時則有克薛傑者以告
于朕汝父肅將大旅以遏亂畧按赤台等謀是用潰
悉就拘執朕取有罪者使辨治之汝父體朕之公其
刑其宥克比于法又使治也速不里獄亦克比于法
惟爾脫歡脫兒赤自朕用汝父用法不阿兄弟親姻
咸麗于憲今衆罔不怨曰爾亦有死耶若有憚志人
則雖死朕將寵之如生肆朕訓汝爾克明時朕言如
是而有福不如是而有禍惟天惟君能禍福人惟天
惟君是敬是畏立身正直制行貞潔是汝之福反是
勿思也能用朕言則不墜汝父之道人亦不能間汝
矣不用朕言則人將仇汝伺汝間汝怨汝父者必曰
汝亦與我夷矣汝則殆哉汝於朕言弗慎繹之汝則
有咎克慎繹之人將敬汝畏汝無間伺汝無慢汝怨

汝者矣又而母而婦有譏欺巧佞構亂之言慎勿聽之則盡善矣至順四年追封忙哥撒兒爲克國公子四人長脫歡次脫兒赤次也先帖木爾次帖木兒不花脫歡爲萬戶無子脫兒赤子明禮帖木兒累官翰林學士承旨從征乃顏有功明禮帖木兒子咬住咬住子也先延徽寺卿也先帖木兒子曰哈刺合孫帖木兒不花子曰塔朮納曰哈里哈孫曰伯答沙

伯答沙幼入宿衛爲寶兒赤歷事成宗武宗由光祿少卿擢同知宣徽院事陞銀青光祿大夫宣徽院使遷授左丞相武宗崩護梓宮葬于北守山陵三年乃

還仁宗即位眷顧益厚延祐二年拜中書右丞相時承平日久朝廷清明君臣端拱廟堂之上而百姓又安於下一時號稱極治仁宗崩帖木迭兒執政改授集賢大學士仍開府儀同三司錄軍國重事未幾以大宗正禮魯忽赤出鎮北方亦以清靜爲治邊民按堵泰定間還朝加太保及倒刺沙構兵上都兵潰伯答沙奉璽綬來上文宗嘉之拜太傅仍爲禮魯忽赤至順三年薨伯答沙爲人清慎寬厚號稱長者其歿也貧無以爲斂人皆歎其廉詔贈推忠佐理正德秉義功臣開府儀同三司太師上柱國追封威平王三

子長馬馬的斤次潑皮次八郎八郎暮而孤其母乞
咬契氏二十而寡守節不他適八郎後爲太宗正府
札魯忽赤能繼其先有成立者母氏之教也

孟速思

孟速思畏兀人世居別失八里古北庭都護之地幼
有奇質年十五盡通本國書太祖聞之召至闕下一
見大悅曰此兒目中有火它日可大用以授睿宗使
視顯懿莊聖皇后分邑歲賦復事世祖於潛藩日見
親用憲宗崩孟速思言于世祖曰神器不可久曠太
祖嫡孫唯王最長且賢宜即皇帝位諸王塔察兒也

孫哥合丹等咸是其言世祖即位眷顧益重南征時
與近臣不只兒爲斷事官及諸王阿里不哥叛相拒
漠北不只兒有二心孟速思知之奏徙之於中都親
監護以往帝以爲忠數命收召豪俊凡所引薦皆極
其選詔與安童並拜丞相固辭帝語安童及丞相伯
顏御史大夫月魯那演等曰賢哉孟速思求之彼族
誠爲罕也孟速思爲人剛嚴謹信蚤居帷幄謀議世
莫得聞至元四年卒年六有十二帝尤哀悼特謚敏
惠武宗朝贈推忠同德佐理功臣太師開府儀同三
司上柱國追封武都王改謚智敏子九人多至大官

列傳卷第十一

列傳卷第十二

一百二十五

翰林學士中書制誥兼修國史宋濂翰林制誥直郎同知制誥兼國史院編修官景禕等奉

勅 賽典赤瞻思丁子納速刺丁忽辛附

賽典赤瞻思丁一名烏馬兒回回人別菴伯爾之裔其國言賽典赤猶華言貴族也太祖西征瞻思丁率千騎以文豹白鶻迎降命入宿衛從征伐以賽典赤呼之而不名太宗即位授豐靖雲內三州都達魯花赤改太原平陽二路達魯花赤入為燕京斷事官憲宗即位命同塔刺渾行六部事遷燕京路總管多惠

政擢採訪使帝伐蜀賽典赤主饋餉供億未嘗闕乏
世祖即位立十路宣撫司擢燕京宣撫使中統二年
拜中書平章政事皆降制獎諭至元元年置陝西五
路西蜀四川行中書省出爲平章政事蒞官三年增
戶九千五百六十五軍一萬二千二百五十五鈔六
千二百二十五定屯田糧九萬七千二十一石樽節
和買鈔三百三十一定中書以聞詔賞銀五千兩仍
命陝西五路四川行院大小官屬並聽節制七年分
鎮四川宋將沓萬壽擁強兵守嘉定與賽典赤軍對
壘一以誠意待之不爲侵掠萬壽心服未幾賽典赤
召還萬壽請置酒爲好左右皆難之賽典赤竟徃不
疑酒至左右復言未可飲賽典赤笑曰若等何見之
小耶沓將軍能毒我其能盡毒我朝之人乎萬壽嘆
服八年有旨大軍見圍襄陽各道宜進兵以牽制之
於是賽典赤偕鄭鼎率兵水陸並進至嘉定獲宋將
二人順流縱筏斷其浮橋獲戰艦二十八艘尋命行
省事于興元專給糧餉十一年帝謂賽典赤曰雲南
朕嘗親臨比因委任失宜使遠人不安欲選謹厚者
撫治之無如卿者賽典赤拜受命退朝即訪求知雲
南地里者畫其山川城郭驛舍軍屯夷險遠近爲圖

以進帝大悅遂拜平章政事行省雲南賜鈔五十萬緡金寶無算時宗王脫忽魯方鎮雲南惑於左右之言以賽典赤至必奪其權具甲兵以爲備賽典赤聞之乃遣其子納速刺丁先至王所請曰天子以雲南守者非人致諸國背叛故命臣來安集之且戒以至境即加撫循今未敢專願王遣一人來共議王聞遽罵其下曰吾幾爲汝輩所誤明日遣親臣撒滿位哈乃等至賽典赤問以何禮見對曰吾等與納速刺丁偕來視猶兄弟也請用子禮見皆以名馬爲贄拜跪甚恭觀者大駭乃設宴陳所賜金寶飲器酒罷盡以與之二人大喜過望明日來謝語之曰二君雖爲宗王親臣未有名爵不可以議國事欲各授君行省斷事官以未見王未敢擅授令一人還先稟王王大悅由是政令一聽賽典赤所爲十二年奏雲南諸夷未附者尚多今擬宣慰司兼行元帥府事並聽行省節制又奏哈刺章雲南壤地均也而州縣皆以萬戶千戶主之宜改置令長並從之十三年以所改雲南郡縣上聞雲南俗無禮儀男女往往自相配偶親死則火之不爲喪祭無秬稻桑麻子弟不知讀書賽典赤教之拜跪之節婚姻行媒死者爲之棺槨奠祭教民

播種爲陂池以備水旱創建孔子廟明倫堂購經史授學田由是文風稍興雲南民以貝代錢是時初行鈔法民不便之賽典赤爲聞于朝許仍其俗又患山路險遠盜賊出沒爲行者病相地置鎮每鎮設土酋吏一人百夫長一人往來者或值劫掠則罪及之有土吏數輩怨賽典赤不已用至京師誣其專僭數事帝顧侍臣曰賽典赤憂國愛民朕洞知之此輩何敢誣告即命械送賽典赤處治之既至脫其械且諭之曰若曹不知上以便宜命我故訴我專僭我今不汝罪且命汝以官能竭忠自贖乎皆扣頭拜謝曰某有死罪平章旣生之而又官之誓以死報交趾叛服不常湖廣省發兵屢征不利賽典赤遣人諭以逆順禍福且約爲兄弟交趾王大喜親至雲南賽典赤郊迎待以賓禮遂乞永爲藩臣蘿槃甸叛往征之有憂色從者問故賽典赤曰吾非憂出征也憂汝曹冒鋒鏑不幸以無辜而死又憂汝曹劫虜平民使不聊生及民叛則又從而征之耳師次蘿槃城三日不降諸將請攻之賽典赤不可遣使以理諭之蘿槃主曰謹奉命越三日又不降諸將奮勇請進兵賽典赤又不可俄而將卒有乘城進攻者賽典赤大怒遽鳴金止之

召萬戶叱責之曰天子命我安撫雲南未嘗命以殺戮也無主將命而擅攻於軍法當誅命左右縛之諸將叩首請俟城下之日從事蘿槃主聞之曰平章寬仁如此吾拒命不祥乃舉國出降將卒亦釋不誅由是西南諸夷翕然歎附夷酋每來見例有所獻納賽典赤悉分賜從官或以給貧民秋毫無所私爲酒食勞酋長製衣冠襪履易其卉服草履酋皆感悅賽典赤居雲南六年至元十六年卒年六十九百姓巷哭葬鄯闡北門交趾王遣使者十二人齊經爲文致祭其辭有生我育我慈父慈母之語使者號泣震野帝思賽典赤之功詔雲南省臣盡守賽典赤成規不得輒改大德元年贈守仁佐運安遠濟美功臣太師開府儀同三司上柱國咸陽王謚忠惠子五人長納速刺丁次哈散廣東道宣慰使都元帥次忽辛次苦速丁元默里建昌路總管次馬速忽雲南諸路行中書省平章政事

納速刺丁累官中奉大夫雲南路宣慰使都元帥至元十六年遷帥大理以軍抵金齒蒲驃曲蠟緬國招安夷寨三百籍戶十二萬二百定租賦置郵傳立衛兵歸以馴象十二入貢有旨賞金五十兩衣二襲麾

元史列傳卷十二
五
下士賞銀有差會其父贍思丁歿雲南省臣於諸夷
失撫綏之方世祖憂之近臣以納速丁爲言十七年
授資德大夫雲南行中書省左丞尋陞右丞建言三
事其一謂雲南省規措所造金薄貿易病民宜罷其
一謂雲南有省有宣慰司又有都元帥府近宣慰司
已奏罷而元帥府尚存臣謂行省旣兼領軍民則元
帥府亦在所當罷其一謂雲南官負子弟入質臣謂
達官子弟當遣餘宜罷奏可二十一年進榮祿大夫
平章政事奏減合刺章冗官歲省俸金九百餘兩屯
田課程專人掌之歲得五千兩三十二年以合刺章

蒙古軍千人從皇太子脫歡征交趾論功賞銀二千
兩二十八年進拜陝西行省平章政事二十九年以
疾卒贈推誠佐理協德功臣太師開府儀同三司上
柱國中書左丞相封延安王子十二人伯顏中書平
章政事烏馬兒江漸行省平章政事劄法兒荆湖宣
慰使忽先雲南行省平章政事沙的雲南行省左丞
阿容太常禮儀院使伯顏察兒中書平章政事佩金
虎符贈太師開府儀同三司上柱國中書左丞相奉
元王謚忠憲
忽辛至元初以出臣子備宿衛世祖善其應對至元

十四年授兵部郎中明年出為河南等路宣慰司同知河南多強盜往往群聚山林劫殺行路官軍收捕失利忽辛以招安自任遣土豪持檄諭之未幾賊二人來自歸忽辛賜之冠巾且諭之曰汝昔為賊今既自歸即良民矣俾侍左右出入房闥無間悉放還令遍諭其黨數日後招集其為首者十輩來身長各七尺餘羅拜庭下顧視異常衆悉驚怖失措忽辛命吏籍其姓名為民俾隨侍左右夜則令卧戶外時呼而飲食之各得其歡心群盜聞之相繼欵附二十一年授雲南諸路轉運使明年轉陝西道又明年授燕南河

北道宣慰司同知尋除南京總管三十年授兩浙鹽運使大德九年進江東道宣慰使改陝西行臺御史中丞再改雲南行省右丞既至條具諸不便事言于宗王請更張之王不可忽辛與左丞劉正馳還京師有旨令宗王協力施行由是一切病民之政悉革而新之豪民規避繇役往往投充王府宿衛有司不勝供給忽辛按朝廷元額所無者悉籍為民去其宿衛三分之一馬龍州首謀叛陰與外賊通持所受宣勅納賊以示信事覺宗王為左右所蔽將釋不問忽辛與劉正反覆研鞠反狀盡得竟斬之軍糧支給地理

遠近不同吏貢錄為茲忽辛籍軍戶姓名及倉廩廩所為更番支給吏茲始除先是贍思丁為雲南平章時建孔子廟為學校撥田五頃以供祭祀教養贍思丁卒田為大德寺所有忽辛按廟學舊藉奪歸之乃復下諸郡邑遍立廟學選文學之士為之教官文風大興王府畜馬繁多悉縱之郊敗民禾稼而牧人又在民家宿食室無寧居忽辛度地置草場搆屋數十間使為牧所民得以安廣南酋沙奴素強悍宋時嘗賜以金印雲南諸部悉平獨此梗化忽辛遣使誘致待之以禮留數月不遣酋請還忽辛曰汝欲還可納印來酋不得已賫印以納忽辛置酒宴勞諷令偕印入覲帝大悅大德五年緬國主負固不臣忽辛遣人諭之曰我老賽典赤平章子也惟先訓是遵凡官府於汝國所不便事當一切為汝更之緬國主聞之遂與使者偕來獻白象一旦曰此象古來所未有今聖德所致敢效方物既入帝賜緬國主以世子之號烏蠻等租賦歲發軍徵索乃集忽辛以利害榜諭諸蠻不遣一卒而租賦咸足俄有為飛語及符讖以惑宗王者忽辛引劉正密為奏馳報朝廷遣使臨問凡造言之徒悉誅之忽辛偕使者還覲大德八年出為四

川行省左丞改江淞行省至大元年拜榮祿大夫江西行省平章政事明年以母老謝職歸養又明年正月卒天曆元年贈守德宣惠敏政功臣上柱國雍國公謚忠簡子二人伯抗中慶路達魯花赤曲列湖南道宣慰使

布魯海牙

布魯海牙畏吾人也祖牙兒八海牙父吉臺海牙俱以功爲其國世臣布魯海牙幼孤依舅氏家就學未幾即善其國書尤精騎射年十八隨其主內附克宿衛太祖西征布魯海牙扈從不避勞苦帝嘉其勤賜以羊馬羶帳又以居里可汗女石抹氏配之太祖崩諸王來會選使燕京總理財幣使還莊聖太后聞其廉謹以名求之於太宗凡中宮軍民匠戶之在燕京中山者悉命統之又賜以中山店舍園田民戶二十授真定路達魯花赤辛卯拜燕南諸路廉訪使佩金虎符賜民戶十未幾授斷事官使職如故時斷事官得專生殺多倚勢作威而布魯海牙小心謹密慎於用刑有民誤歐人死吏論以重法其子號泣請代死布魯海牙戒吏使擒于市懼則殺之旣而不懼乃曰誤歐人死情有可宥子而能孝義無可誅遂併釋之

使出銀以資葬埋且呼死者家諭之其人悅從是時
法制未定奴有罪者主得專殺布魯海牙知其非法
而不能救嘗出金贖死者數十人征討之際隸軍籍
者憚於行役往往募人代之又軍中多逃歸者朝廷
下制募代者杖百逃歸者死命布魯海牙與斷事官
卜只兒按順天等路及至州縣得募人代者萬一千
戶逃者十二人然募者聞命將下已潛遣家人易代
募者布魯海牙聞之歎曰募者已懼罪往易逃者因
單弱思歸情皆可矜吾可不伸理耶遂奏其狀皆得
輕減有丁多產富而家人不往及未至役所而即逃
者則曰此而不殺何以戒後有竊妓逃者吏論當死
布魯海牙曰敗亂綱常罪固宜死此妓也豈可例論
命杖之其執法平允類如此世祖即位擇信臣宣撫
十道命布魯海牙使真定真定富民出錢貸人者不
踰時倍取其息布魯海牙正其罪使償者息如本而
止後定爲令中統鈔法行以金銀爲本本至乃降新
鈔時莊聖太后已命取真定金銀由是真定無本鈔
不可得布魯海牙遣幕僚邢澤往謂平章王文統曰
昔奉太后旨金銀悉送至上京真定南北要衝之地
居民商賈甚多今舊鈔既罷新鈔不降何以爲政且

以金銀爲本豈若以民爲本又太后之取金帛以賞推戴之功也其爲本不亦大乎文統不能奪立降鈔五千定民賴以便俄遷順德等路宣慰使佩金虎符來朝帝命坐慰勞之賜以海東青鶻至元二年秋卒年六十九布魯海牙性孝友造大宅於燕京自畏吾國迎母來居事之得祿不入私室幼時叔父阿里普海牙欺之盡有其產及貴顯築室宅旁迎阿里普海牙居之弟益特思海牙以宿憾爲言常慰諭之終無間言帝嘗賜以太府綾絹五千匹絲絮相等弟求四之一納其國賦盡與之無吝色初布魯海牙拜廉使命下之日子希憲適生喜曰吾聞古以官爲姓天其以廉爲吾宗之姓乎故子孫皆姓廉氏後或奏廉氏仕進者多宜稍汰去世祖曰布魯海牙功多子孫亦朕所知非汝當預大德初贈儀同三司大司徒追封魏國公謚孝懿子希閔希憲希恕希尹希顏希愿希魯希貢希希中希括孫五十三人登顯仕者代有之希憲自有傳

高智耀子睿附

高智耀河西人世仕夏國會祖逸大都督府尹祖良惠右丞相智耀登本國進士第夏亡隱賀蘭山太宗

訪求河西故家子孫之賢者衆以智耀對召見將用之遽辭歸皇子闊端鎮西涼儒者皆隸役智耀謁藩邸言儒者給復已久一旦與厮養同役非便請除之皇子從其言欲奏官之不就憲宗即位智耀入見言儒者所學堯舜禹湯文武之道自古有國家者用之則治不用則否養成其材將以資其用也宜蠲免徭役以教育之帝問儒家何如巫醫對曰儒以綱常治天下豈方技所得比帝曰善前此未有以是告朕者詔復海內儒士徭役無有所與世祖在潛邸已聞其賢及即位召見又力言儒術有補治道反覆辯論辭累千百帝異其言鑄印授之命凡免役儒戶皆從之給公文爲左驗時淮蜀士遭俘虜者皆沒爲奴智耀奏言以儒爲驅古無有也陛下方以古道爲治宜除之以風厲天下帝然之即拜翰林學士命循行郡縣區別之得數千人貴臣或言其詭濫帝詰之對曰士譬則金也金色有淺深謂之非金不可才藝有淺深謂之非士亦不可帝悅更寵賚之智耀又言國初庶政草創綱紀未張宜倣前代置御史臺以糾肅官常至元五年立御史臺用其議也擢西夏中興等路提刑按察使會西北藩王遣使入朝謂本朝舊俗與漢

法異今留漢地建都邑城郭儀文制度遵用漢法其
故何如帝求報聘之使以析其問智耀入見請行帝
問所答畫一敷對稱旨即日遣就道至上京病卒帝
爲之震悼後贈崇文贊治功臣金紫光祿大夫司徒
柱國追封寧國公謚文忠子睿

睿資稟直亮智耀之北使也携之以行及卒帝問其
子安在近臣以睿見時年十六授符寶郎出入禁闥
恭謹詳雅久之授唐兀衛指揮副使歷翰林待制禮
部侍郎除嘉興路總管境內有宿盜白晝掠民財摘
者積十數輩莫敢近睿下令不旬日生擒之一郡以

寧擢江東道提刑按察使部內草竊陸梁聲言圍宣
城郡將怯懦城門不開睿召責之曰寇勢方熾官先
示弱民何所憑即命密治兵衛而洞開城門聽民出
入貿易自便旣而寇以有備不敢進遂討平之除同
僉行樞密院事遷浙西道肅政廉訪使鹽官州民有
連結黨與持郡邑短長目目曰十老吏莫敢問睿悉
按以法闔境快之拜江南行臺侍御史進御史中丞
除淮東道肅政廉訪使盜竊真州庫鈔三萬緡有司
大索追逮平民數百人吏因爲奸利睿躬自詳讞而
得其情即縱遣之未幾果得真盜復拜南臺御史中

丞務持大體有儒者之風焉延祐元年卒年六十有六累贈推忠佐理功臣太傅開府儀同三司上柱國追封寧國公謚貞簡子納麟官至大尉江南諸道行御史臺大夫

鐵哥

鐵哥姓伽乃氏迦葉彌兒人迦葉彌兒者西域築乾國也父幹脫赤與叔父那摩俱學浮屠氏幹脫赤兄弟相謂曰世道擾攘吾國將亡東比有天子氣盍往歸之乃偕入見太宗禮遇之定宗師事那摩以幹脫赤佩金符奉使省民瘼憲宗尊那摩為國師授玉印

總天下釋教幹脫赤亦貴用事領迦葉彌兒萬戶奏曰迦葉彌兒西陲小國尚未臣服請往諭之詔偕近侍以往其國主不從怒而殺之帝為發兵誅國主元貞元年封代國公謚忠遂幹脫赤之歿鐵哥甫四歲性穎悟不為嬉戲從那摩入見帝問誰氏子對曰兄幹脫赤子也帝方食雞輟以賜鐵哥鐵哥捧而不食帝問之對曰將以遺母帝竒之加賜一雞世祖即位幸香山永安寺見書畏吾字於壁問誰所書僧對曰國師兄子鐵哥書也帝召見愛其容儀秀麗語音清亮命隸丞相孛羅備宿衛先是世祖事憲宗甚親愛

後以讒稍踈國師導世祖宜加敬慎遂友愛如初至是帝將用鐵哥曰吾以酬國師也於是鐵哥年十七詔擇貴家女妻之辭曰臣母漢人每欲求漢人女爲婦臣不敢傷母心乃爲娶井氏女久之命掌饗膳湯藥日益親密至元十六年鐵哥奏曰武臣佩符古制也今長民者亦佩符請省之以彰武職從之十七年進正議大夫尚膳監帝嘗諭之曰朕聞父飲藥子先嘗之君飲藥臣先嘗之今卿典朕膳凡飲食湯藥宜先嘗之又曰朕以宿衛士隸卿其可任使者疏其才能朕將用之詔賜第於大明宮之左留守段圭言逼

木局不便帝曰俾居近禁闥以便召使木局稍隘又何害焉高州人言州境多野獸害稼願捕以充貢鐵哥曰捕獸充貢徒濟其私耳且擾民不可聽從之十九年遷同知宣徽院事領尚膳監有食尚食餘餅者帝察知之怒鐵哥曰失餅之罪在臣食者何與焉內府食用圓米鐵哥奏曰計粳米一石僅得圓米四斗請自今非御用止給常米帝皆善之進中奉大夫司農寺達魯花赤從獵百杏兒之地獵人亦不刺金射兔誤中名駝駝死帝怒命誅之鐵哥曰殺人償畜刑

上帝驚曰誤耶史官必書亟釋之庾人有盜鑿稅

米者罪當死鐵哥諫曰臣鞠庾人其母病盜秬欲食
母耳請貸之牧人有盜割駝峯者將誅之鐵哥曰生
割駝峯誠忍人也然殺之恐乖陛下仁恕心詔皆免死
二十二年進正奉大夫奏司農寺宜陞爲大司農司
秩二品使天下知朝廷重農之意制可進資善大夫
司農時司農供膳有司多擾民鐵哥奏曰屯田則備
諸物立供膳司甚便從之桓州飢民鬻子女以爲食
鐵哥奏以官帑贖之二十四年從征乃顏至撒兒都
之地叛王塔不台率兵奄至鐵哥奏曰昔李廣一將
耳尚能以疑退敵况陛下萬乘之威乎今彼衆我寡

不得地利當設疑以退之於是帝張曲蓋據胡床鐵
哥從容進酒塔不台按兵覘伺懼有伏遂引去帝以
金章宗玉帶賜之二十九年進榮祿大夫中書平章
政事以病足聽輿轎入殿門帝嘗憶北征事不能悉
記鐵哥條舉甚詳帝悅以金束帶賜之初詔遣宋新
附民種蒲萄於野馬川晃火兒不剌之地既獻其實
鐵哥以北方多寒奏歲賜衣服從之成宗即位以鐵
哥先朝舊臣賜銀一千兩鈔十萬貫他日又賜以瑪
瑙碗謂鐵哥曰此器先皇所用朕今賜卿以卿久侍
先皇故也大德元年加光祿大夫三年乞解機務從

之仍授平章政事議中書省事時諸王朝見未有知
典故者帝曰惟鐵哥知之俾專其事凡廩餼金帛之
數皆遵世祖制詔自今懷諸王之禮悉命鐵哥掌之
七年復拜中書平章政事平灤大水鐵哥奏曰散財
聚民古之道也今平灤水災不加賑恤民不聊生矣
從之十年丁母憂詔奪情起復遼王脫脫入朝從者
執兵入大明宮鐵哥劾止之王懼謝從幸晉山饑民
相望鐵哥輒發廩賑之既乃陳疏自劾帝稱善不已
武宗即位賜金一百兩加金紫光祿大夫遙授中書
右丞相有訴寧遠王闊闊出有逆謀者命誅之鐵哥

知其誣廷辨之由是得釋徙高麗二年領度支院尋
賜江州稻田五千畝仁宗皇慶元年授開府儀同三
司太傅錄軍國重事乃進奏世祖子惟寧遠王在宜
賜還從之二年奉命詣萬安寺祀世祖感疾歸皇太
后令內臣問疾鐵哥附奏曰臣死無日願太后輔陛
下布惟新之政社稷之福也是年薨賜賻禮加厚勅
有司治喪事贈太師開府儀同三司上柱國追封秦
國公謚忠穆加贈推誠守正佐理翊戴功臣封延安
王改謚忠獻子六人忽察准東宣慰使平安奴太平
路達魯花赤也識哥同知山東宣慰司事虎里台同

知真定總管府事亦可麻同知都護府事重喜隆禧
院副使孫八人伯顏中書平章政事餘多居宿衛

列傳卷第十二

